

清代
叢刊
記

金壺七墨

黃鈞宰著

三



金壺遊墨卷一

鉢池黃鈞宰天河著

徐警

咸豐三年元旦風晦。白日慘淡。冷雨兼旬。歷十九日始晴。同人遊雲龍山登戲馬臺。設飲於黃樓。酒半忽見軍士數十人自城下陸續西行。詢之則粵賊已抵江甯。若輩皆陸帥大營潰敗者。同人驚愕回署。而兵勇入自南城者更多。詢之則安慶失守。蔣中丞文慶殉難。渠自蕪湖敗歸者。於是曹君春生老母在南。失聲慟哭。屠君英伯寄財京口。徹夜欷歔。或望雲而泣。田園或對食而憂。妻妾平時諱飾言。貌深心若井。至是乃如溫犀禹鼎。各見肝腸。所謂觀人於迫者此也。會予有海贛之役。文書自省垣縋城而至。即日就道。留別徐州云。輕身作健事。長征入耳驚。濤挾怒聲。匹馬短刀寒。日下滿天兵。氣出彭城。

武昌初陷

桂林長沙武昌同為省會。同議固守。追賊者同為向江諸公。而有陷有不陷。則機會利鈍異也。初粵賊竄攻桂林。向軍門自永安帥眾。介馬疾馳。繞出賊前。先一時入省會。賊營象鼻山礮丸入城如雨。又製雲梯。呂公車。薄城平攻。公與諸將晝夜守禦。以長竿縛火炬。竝煎松膠。

憑據為餅火之烟障。賊目賊多墮死。此先聲奪人也。及入湖南。得船於全州。而賊勢一縱。結

營於長沙之鰲山。廟天心閣等。高阜。江公

忠源

望見驚曰。賊據此。長沙危矣。急率所部爭之。

賊少卻。遽趣移壘。壘距賊營數十武。共汲一井。擊柝聲相聞。自是長沙止南門受敵。向軍門又與部將張國樞等。多方擾之。迫賊巢背水面。城當絕地。疊有斬擒。賊自郴州得採煤夫千人。仿鰲翻法。穴地攻城。城圯數十丈。副將鄧紹良大呼躍出城闕。手刃悍賊。後者復登復刃之。麀鬪間礮穿紹良右膊。屹立不動。弁兵奮力。壘土築城。賊始退。此銳氣制勝也。方是時。偽王七人。大全已成擒。雲山及洪逆妹夫蕭朝貴。先後斃於礮。秀泉慮人心渙散。取玉雕壘。謬稱天賜。脅衆呼萬歲。大搜民船。由臨資渡洞庭。而賊勢再縱。其鋒不可遏矣。岳州舊存吳三桂軍械。礮位盡為賊有。漢口為數省通衢。百貨山集。焚掠五晝夜。以浮橋徑達武昌。向軍門又自湖南倍道追至。營於洪山。兵士戰轉三省。未嘗一日息銳氣。少衰矣。時大營與省兵為賊壘所隔。勢不能合。軍門既燬賊壘數十座。殺斃及驅溺死者無算。屍骸枕藉。河水為之不流。日遣敢死士縋城而入。約兵策應。鄂撫常公大清欲出戰。而守令以民志未孚。慮其驚潰。欲俟客兵抵城下始出。軍聲既鈍。示賊以弱。已而寒雨大沛。火藥不燃。兵士攻剽經旬。亦極疲困。向公命收隊。而城不保矣。天河生曰。國初吳逆之叛。朝廷以重兵扼守洞庭。使賊不得出。

湖南一步卒以制其死命。西南有變。衡湘誠鎖鑰哉。

金陵被圍

賊踞武昌久。向軍門晝夜襲擊。逆衆不能安枕。探知襄樊以北已設重兵。而長江惟建瀛一軍。懦怯不足畏。乃定東下金陵之計。自永安至此。所擄男女近五十萬人。船以萬計。資糧軍火。財帛婦稚。盡置舟中。新舊賊步騎夾岸。旌旗蔽野。帆檣如雲。諸偽王皆衣黃袍。偽侯以下衣紅繡龍織鳳。間以雲物及麟獅鸞鶴之屬。冠亦如之。時據船樓上置酒會飲。懸燈張彩。夜半照耀如火。龍畫擇男女姣好者。各傅脂粉。錦衣珠飾。俾執役於左右。後艙則鳴金播鼓。絲竹間作。如世俗之戲十番者。長江數千里。僅於老鼠峽東梁山兩遇官兵。未及交綏而退。總兵恩長陳勝元中礮落水死。而兩江督陸建瀛縮首金陵矣。建瀛之初出師也。中軍以下屬橐鞬。將弁整隊伍。敬候大帥祭旗。而建瀛久不出。則與愛姬執手涕泣。不忍遽別也。

洪大全

大全湖南衡山人。幼慧。九齡能背誦十三經。粗解詩詞。長而深自負。屢應童子試不售。益狂悖。好大言。時粵中盜賊橫行。不下數十股。大全陰察之。無足語者。乃投洪逆。聯宗誼。洪亦亟加倚任。相與定營制。整軍律。共守永安。而楊秀清忌之。積不相能。會官兵攻永安急。大全囚

服出城被擒隨營丁主事守存等奉檄獻俘於京師。城賊突出千人謀奪之。鄒中丞鳴鶴飛書促其兼程前進。七日而抵全州。丁知大全衡產。恐為賊黨。篡取乃陽檄陸路驛站撥兵護送。而改由水程。晝夜趨行。置大全內艙。塞其窗無少隙。又八日而抵長沙。大全不知船行之速。每曰到衡州。便當陸行。兵役偽應之。至是始曰。衡州到矣。大全出艙四顧曰。此長沙也。不謂汝輩能令我至此。吾其休矣。雖然。秀清豎子。不從吾言。終亦成擒耳。途中題詞曰。奇身虎口運籌工。恨賊徒不識英雄。漫將金鎖縮飛鴻。幾時生羽翼。萬里御長風。一事無成人漸老。壯懷要問天公。六韜三略總成空。哥哥行不得。淅瀝杜鵑紅。

孝丐

曩客彭城。行於城北之衢。見一丐。齒方壯。負一老嫗。年六十餘。乞食於市。觀其衣。藍縷綴結。不掩肢體。朔風凜冽。股栗不能勝。而嫗身絮襦甚完整。予既心識之。從之過市。市人與之食。則置嫗簷下。奉食於前。嫗食已。以其餘強之。乃自食。如是者再。予益嗟異。嫗自下走。足微跛。丐左右扶掖之。惟恐傾跌。色藹然以和。進而問曰。若汝母乎。曰然。曰得食奉母正也。然汝身寒甚。不已饑乎。曰得母飽煖以終天年。即身死亦樂。凍餓安足憂。天河生曰。嗟乎。窮困而至於丐。竭其力。猶足養親。獨壽命見阨於天。遂無可如何。丐有母。丐而福矣。問其姓。曰王。不知

其名沛邑人子死妻去有田三畝去年河決豐沛間家被淹沒而丐也

雙溝

徐郡雙溝鎮四屬接壤向為奸宄出沒之所每遇盜案彼此關移及文投六扇門中賊去九霄雲外矣近日潰散兵勇佩刀帶劍者所在皆是尤為畏途予過此夜半暫眠忽聞門外喧呼則紅光燭天鄰舍火起僕夫匆迫欲行予曰出門則行裝頃刻盡矣毋寧候之果不免償汝車也及明延燒五家逆旅屋幸存出鎮里餘有裸體被戕者二人相距不及百步一傷在額一傷腹血浸淫猶未止也

清河

粵賊既破金陵鎮江繼之即渡江陷揚州遊騎於邵球之南淮人將遷貴者歎於室富者憂於門貧而強者喜於道奸謀詭計至有不可忍言者清河宰吳公仲仙曰是不可口舌爭也戮二人率數百人疾趨至郡城且曰大兵至矣編張示諭備供具以待之清河人見之曰賊從南來縣主方迎往吾無憂矣郡中人聞之曰吳公不妄言必有大兵姑且止賊退遷者反嚮之強而喜者嗒然釋械而歸

紀變

積芻糧壹號令嚴出入守城以為禦賊計也今之城守官耀兵揚武不能使賊不入而第能禁民不出武昌金陵揚州殺人之多皆坐此予行抵王營聞南中風聲甚惡便道回淮草木皆兵氣象愁慘城門禁出甚嚴有二月二十五日紀變句云渡江賊衆如雲屯萬家夜奪城東門風聲撼空草木鬪雨氣上逼星辰昏兒啼女哭慎勿苦城門有官方怒汝道旁逢首伊何人卽帥之女千金身朝居華屋豔蘭澤暮投民舍蒙沙塵阿翁為國惜身力累爾流離淚沾臆

海州

端午後一日由鹽河達海州及城日將暮矣遠望有黔而長者裸體負門而立形狀魁梧目炯炯左右視如神茶鬚墨伸臂揚掌執將撲人者然過客環觀僅及其腹初甚異之漸近乃知匪民被獲官釘其手足於城門也先是一二月暴客四起行旅絕跡自嚴刑德創數十人強徒稍斂道路始通

銘

贛榆學署有古槐二蔭廣數丈腹空可容一人陽湖錢筠士刻詩其中邑士屬予為銘語識之云虛其中拙其外枝蟠葉蕃無災無害余雨農藏一古玉其面似馬背則犬也亦屬為銘

云逸羣之馬不備輪通衢之犬不吠人可人如玉誰其倫

孝廉方正

初詔舉孝廉方正贛榆令以李君繡谷應名寔相副當之無愧色而繡谷固辭其鄉人曰輦金以爭之而不得者多矣子何辭之迂也繡谷曰吾無金故不爭吾懼夫人之疑若有金也故辭令聞益重之卒具行寔以上同時某屬應詔無人會有諸生某行誼甚劣聚賭宿妓唆訟詐財無一不為其才又足以濟之素為鄉黨患即有司亦無如何乃與紳士議以生應舉不令費一錢藉以籠絡束縛之倘幸而召試錄用亦可出諸遠方為境內除一害計定語生大詫曰歇後鄭五作宰相天下時事可知矣我乃得為孝廉方正欣然從之後以軍興故未奉召試某里居自加六品服遇事生風又加甚焉一日赴妓院僕攜帖袋以從酒朋賭友咸在或指其頭銜戲之曰君須顧名思義某曰吾固知之間事不過爾爾是科吾見辭者二人焉一為陸小巖師一為繡谷繡谷辭之不得遂不辭小巖師曰吾老矣何可當也必遂所辭而罷

九節銅彝

粵賊初陷金陵聲勢極壯環城皆堅壘自大勝關至七里州賊舟聯絡不絕向大臣結營孝

陵衛大小百數十戰。奪壘焚船。遣散難民水手以萬計。賊始斂戢。一日大霧。公令軍士偽為賊裝。趨其前。而伏兵於壘後。戒以聞礮齊發。腹背夾攻。賊大驚。自相蹂躪死者無算。千總某左挾長戟。右持虎頭鉤。率眾躍馬登土城。盛氣剽洗。霧為之開。及歸。袍袴皆赤。六人扶掖入營。向公大獎。異之。親為進食。又加九節銅轟於鍾山高阜。護以排銃。更番迭進。我兵乘勢攻儀鳳通濟門。城中火葯崩震。人聲沸騰。勢將驚潰。公望見賊眾如蝗如蟻。兵勇不敵其半。慮攻剽太急。則困獸鼠突。所傷寔多。且金陵殘破已甚。而蘇常完富。定計以力保東南為上策。於是揮兵使退。築長圍以困之。尤專意扼守東霸。并會合鎮江軍。力護下游云。

樓船

揚州城臨運河。城外地狹者。不過二三丈。鹽知事張翊國。使卒肩卒梯城而登。賊眾自焚跑馬樓受傷而返。營務諸員。遣勇士密量城垣高低。距河遠近。取上游空運糧艘。於船尾支板斜出二丈餘。累級而上。若雲梯然。預遣參將馮景尼伏兵東岸以待。屆期令總兵雙來力攻北城。游擊師長鑣駕船至城東。船尾適倚便意。門女牆東岸亦直接船頭。賊眾初見船與城平。大駭而散。而景尼兵無一至者。賊復集。縱火焚船。雙來右轂中礮昏昏中再呼殺賊而殞。是役為揚州軍第一奇策。誤於景尼一人。革職不足蔽辜也。

四舟子

是年賊以十軍由皖豫渡黃河。躡太行而終踞直隸之靜海縣。有舟子四人義而智。初秀清既得江甯。即議分隊由清淮北趨。有舟子大言曰。北省無水乏糧。遇困莫解。今據長江之險。擁財賦之地。計無有便於此者。乃止。清淮以北獲安。又在皖北擄船數千。以所得財帛子女寔之。環結為水寨。一舟子言於賊首曰。百貨恃船流通。今環結於此。他船聞風者。不敢復至。布帛菽粟無由而來。是自困之道也。乃舍之。難民乘間逸去者甚衆。及攻開封不克。以二船滿載火葯渡江。賊目十餘人監之。舟子兄弟二人密議曰。賊勢之熾。專恃銃礮。北去何堪。有此。故舟中流私鑿沈之。賊目俱溺斃。二人亦滅頂而死。

地道

江甯賊又分數軍。溯江而上。圍攻南昌。屢掘地道。一日掘甫半。城中人埋甕於地。伏而聽之。尋其聲而對掘一隧。令敢死士攜利刃。懷兩洋銃。蛇行而出。適有賊酋服黃袍紅披風者。據地道鞠躬俯視。問左右何時裝葯。何時封門。士突出。遽以利刃劈其面。自左眼以至左頤。輔骨肉皆飛去。衆駭散。不知其何自來也。士復以洋銃左右擊。縱身入隧而回。

陳玉標

海屬與東省毗連盜賊繁多而陳玉標為最著少時遇捕斷左手能以利刃縛臂上而右手持長槍馬上衝突當者披靡又與營兵縣役相結納官弁怯懦不敢問強者或欲擒治則先有趣之遠颺者咸豐四年春玉標率數千人趨海州把總李步瑤馬蹶被執賊勢益張予團練鄉間以張生樹坊力得兵民千二百人二月既望梁寶生觀察統兵至州而密約東省道府出兵會剿賊竄贛榆沙河鎮鎮紳孫氏者故與相識斂千金餽之玉標叩首眾賊前乞勿淫擄以報孫氏孫復為步瑤請玉標親解其縛長跽請罪涕泣具言不敢為亂勢非得已束手則性命付人矣明日觀察兵追至贛榆賊竄歡墩堡揚言將犯邑城而寔欲東趨青口觀察即擇要隘乘夜出陣賊偵騎從月下望見隊伍靜肅星火出沒又聞銃砲聲殷殷不知其處偵還報賊不敢東炊飯未熟將西行而山東沂州官兵突出邀擊我兵截其左民團鳴金鼓譟賊棄輜重遁走夾谷山中迷亂不知所向山東兵貪得財帛不追賊民團合禽數十人予參與驗問無跡者擇之有內襲婦人衣袴懷金臂數釧者誅之又明日遣兵搜山賊蹤既盡而返而玉標卒未就擒不知所終

三靠

贛邑西北多山田無溝澮崇朝大雨則民患水災不雨兼旬則木苗枯槁故邑人有三靠之

說謂造房靠牆。患病靠命。種田靠天也。

閏七夕

閏七夕續娶。隋九蕪刺史贈以梨園演劇三日。並屬宰筠筮明府。經紀其事。誼甚殷也。贈聯云。紀閏秋清。為有雙星遲駕鵲。催妝才富。好傾八斗賦。驚鴻見者皆稱工巧。王魯生先生筆也。

王魯生

王魯生先生名復。常熟人。工墨梅。詩學清瞻。當麟公見亭督南河。雅尚文藝。先生名重公卿間。世傳閨中題壁句云。薄采慈姑儷夙願。濃煎益母慰相思。臨行互剪羅衫袖。珍重嗁痕好護持。先生作也。及客贛署。年已五十餘。而談論風生。意趣瀟灑如故。同人中尤與鈞洽。鈞嘗以謗言質諸九翁。九翁笑之。乃罷先生曰。此即天河磊落處也。若某翁者。心憾公而口不言。其招怨甯有已哉。粵賊之變。先生有江干紀事詩。錄其六云。大將旌旗度嶺頭。五溪毒霧踏鳶愁。人過峴首思羊祜。賊喜祁山失武侯。篝火頻聞孤語幻。兵符旋屬虎牙收。更誰解佩元戎印。天意干戈未肯休。千里狼烽一一升。臺城空率健兒憑。劫深仙佛靈難救。山噤金銀氣不騰。戰艦連檣通北固。援兵無路隔西陵。艱難獨有諸軍帥。若覓輕舟載庾冰。萬眾環城似

守株桓桓使相握兵符。雕鏤器皿供行帳。絡繹珍羞學御廚。箋奏漫陳淝水捷。詔書空發羽林孤。丹青他日麒麟閣。添寫行軍富貴圖。潰圍萬衆忽縱橫。對簿俄看忤貴臣。豈為僨軍誅馬謖。似聞歸罪殺袁真。淒涼羣馬分諸將。寥落殘兵聚海濱。不死沙場死廷尉。英雄千古恨難伸。瘡痍餘生拜馬頭。遺民流落古揚州。水邊林木營巢燕。望裏烽烟喘月牛。半夜淒風哭新鬼。一城焦土換紅樓。追窮莫泥孫吳戒。瓜步城宜力戰收。岸虎何如水上龍。廉頗老去倦彎弓。推心幸得降人力。持重難收盡敵功。諸將兒嬉同霸上。三軍喜氣雜桑中。行間特拔君恩溥。珍重威名慎始終。又觸藩祇計成禽易。出柙誰知制虎難。百騎甘寧能卻敵。三登董父更翻城。皆一時寔錄也。先是廣西獨秀峰有題壁三十首。遜此遠矣。

蘭生

山左蘭生口吃。眇一目。左耳重聽。生平獨善象棋。不取敵子。而能制其命。曰吾以服人。不欲多殺傷也。時人謂之仁義之師。

劉秋舫

予客青口。主同年劉秋舫家。因秋舫以交李繡谷。蔣蘭泉。余松南。麟圃諸君。招飲無虛日。飲輒爛醉。或放浪踰禮法。秋舫必左右之。夜漏三四下。俟予歸寢而後去。慮其失言過行。貽士

夫笑也。予不善治生事。恒與秋舫謀之。秋舫入城。亦主予。論心談藝。無倦時。處鄉里。善解紛。難戚友。大事咸就理焉。嘗有鄉人訟田。累年不決。秋舫以片言折之。兩造悅服。前後司牧倚。若左右手。公私以貨財相託者。歲不下數千金。而秋舫貧。匱如故也。咸豐五年。將以縣令入都。而先於正月病不起。往哭之。哀越日。以庶羞清酌祭諸其靈。而綴以文。曰。嗚呼。劉君。生死長已。誰謂子痴。乃至不起。君死之日。我聞於途。識與不識。重欷累歎。以君之才。而折君齒。夫人所悲。况予與子。君性剛毅。內抱沈潛。冥直而折。不靡而全。君蘊其學。發為文辭。霜英秋挺。雲藻春擣。當世承平。囊括衆務。良木向榮。哲工斯遇。擢景彤廷。趨光雲路。令譽風馳。高才星聚。致身之道。蓋亦多途。君守載籍。以獵以魚。世嫉恢奇。衆嗤耿介。骨體之強焉。往不敗。黃鵠折翼。蹭蹬而旋。芳草在谷。鬱鬱經年。莫涅匪白。莫磨匪堅。衆人高華。而子逆遠。及世多故。頽洞風塵。人撼而顛。子卓其神。李布重諾。仲連解紛。事靡鉅細。子集於成。方今州郡。縉紳先生。匪曰利已。即用諛人。君持以正。卓立中流。錫惠自衆。中亦招尤。往者徐究。姦宄鳴張。街號巷哭。晝夜皇皇。子集壯士。手挈其綱。卒并枳棘。屏翰一方。靡詛不生。靡祝不死。彼蒼者天。自古如此。惟君尤酷。費志方長。年強心侈。運否身亡。如驥就途。方駕而蹶。如雲在天。未雨而滅。更有痛者。禍不單罹。母弟繼隕。家難斯多。及身不幸。手無斧柯。悲銜徇道。繼緒靡他。天心霄漢。託

命山阿。君死有知。傷如之何。昔歲癸丑。賊寇兩江。君遊而返。我來此邦。投我瓊玖。勗我科名。凡我瑣屑。皆子經營。世事夢瀆。誰相知心。譬行幽黠。恃子光明。子有良友。競豪且才。非屑予交。子介以來。春晨秋夕。文酒歡呼。惟此數人。有會必俱。或飲而酣。載歌載笑。子於斯時。巖巖其貌。酒闌人散。或止或行。子於斯時。款款其情。良會不常。白日如馭。今見諸君。乃不覩子。披覽遺牋。積篋盈几。目想君形。聲猶在耳。往子有行。君聞以卽。自君之亡。誰箴子闕。子醉忤君。君默不語。不慎將來。復誰賞我。嗚呼秋舫。光曜何存。聞君在殯。寥落無人。昔日之日。子勞其身。朝求夕訴。滿室盈門。人事叵測。胡逐胡馳。矧茲喪亂。萬代一時。思子不至。疑子遠行。六合同寢。子夢先醒。望雲壺嶠。雪涕滄溟。人亦有言。九京可作。冷署青尊。荒城夜柝。倘子重來。云胡不樂。

李九

李九者。贛之青口人。邑人未識其名。問李九則無不知者。兄七。與鄰人訟隙地。縣官索賄。七弗與。鄰人賂之。繫七典史署。朝暮逼迫。繼以榜掠。飲食又不以時。至七憤而溢。時縣令吳慈元。典史費長春也。九方午食。聞七死。掀案而起。曰。所不與。兄復此讎者。非丈夫也。投狀海州。州不為理。控諸監司。仍檄州。九念外省官吏。上下徇情。終無能為。兄雪冤者。乃徒步入上京。

具狀都察院事聞下蘇撫集訊九既多歷風霜又到省皆罄日受挫折瘡疥發於腹背卧病中惟祝七寃得雪即身死無憾九婦聞之日夜涕泣焚香告天求夫生還願以身代而蕊元長春賄屬承審官責九健訟鞭笞慘毒身無完膚九忍死不少屈蕊元等度終不可威脅因屬其素所親信者就旅舍置酒召美伎反復開陳餌以重利九始終閉目不言既而曰吾與若厚不忍牽累不然今日之舉即公堂左證也蕊元等聞之益懼計無所出乃議以毒手取九命矣先是醫士某為九診病長春與相識夜往謁之曰李九必欲殺我奈何因袖出餅金為壽醫士佯驚謝長春曰不寧惟是今日長春一命吳公一官懸於君手君誠能因九病藥而酖之報德方長不食言也醫許諾約以十日內乘便行事會陳蓮史廉訪蒞任微聞李氏寃即日提案詳摘蕊元等頂戴將加刑訊九則躡踊堂上眼枯無淚長涕而號蕊元等竟不能諱盡得寔情獄具蕊元褫職長春戍邊吏役正法者二人九至是喟然數曰今而後死無憾矣時受病已深奄然一息歸至半途竟卒鎮中紳士以鼓樂迎其柩其妻見柩觸額求死姻黨勸慰乃歸天河生曰予聞青口士夫道九事至今勃勃有生氣曩許秋舫為作鵲鴿原傳奇會兵亂未及脫稿嗚呼九不以生死負疚於其兄今秋舫甫亡震鈞倉皇戎馬間乃不克踐文字之諾倘亦九之所羞與

張炳垣

張繼庚字炳垣江甯諸生粵賊初破江甯炳垣欲自盡既而曰徒死無益遂降之改名葉子法處之機匠館中同郡吳畏堂初客漢口與漢陽令趙公德轍故相識至是吳亦陷賊而趙公擢授江甯府炳垣因與畏堂謀賄守門賊通書趙公約內應趙為言於向公許之炳垣先後上書三十六丞初議入朝陽門賊首忽將守門賊調赴他處而別遣廣西長髮者守之乃更約取道後湖以草船伏人而進賊首頗微聞之周胡築土城防範甚密於是計不果行同謀有張沛澤者廣西人見事不就背之去炳垣乃復與張鷓頭約鷓頭故無賴然感炳垣意氣私結儕輩百餘人願以一死相報計定炳垣託故出城親謁向公極陳江甯可破狀約大兵夜集儀鳳門則城內開門納之公付以免死牌五千紙定議待期舉行矣沛澤故知其謀見鷓頭炳垣數相語曰予我千金不爾當發其事炳垣曰吾安所得千金者沛澤果以白賊立逮炳垣拷掠備至同館人曰內應首謀寔為張氏繼庚此葉子法非為叛者獄稍緩而秀清改命賊酋胡元偉承審元偉者故廬州太守陷江忠烈公於死而以城降賊者也嚴刑酷法至燒鐵烙體刺猪鬣乳中炳垣憤恨不能忍曰他人問吾無可承公乃大清堂堂四品官吾亦公祖部民也當以寔供內應事大非一二江甯人所能皆由廣西老賊首謀且人多吾

不能記。請以簿至。胡顧左右取偽官冊。炳垣指一廣西人曰。此同謀者。即逮其人而殺之。又指一人曰。此知情者。又殺之。殺至三十餘人。秀清曰。已矣。墮其計矣。彼所指皆老兄弟。非寔情也。勿復問。遂用車裂法。繫炳垣手足及首。鞭五馬而馳之。左右手足先斷。首次之。餘體又裂為二。觀者皆掩泣。鵝頭聞之曰。嗟乎。吾既以死許張公。畏禍食言。非丈夫也。且張公以數言殺賊數十。而不一語及我。望我成其志耳。我必圖之。時賊衆稽察嚴密。各城增設木柵數重。及期。鵝頭率其黨殺守門賊七人。而無計。越柵開城。官兵夜至。不得入。明日賊中大索殺人者。久之。無左驗。事將寢矣。鵝頭過所善沈獸醫。飲酒酣。大言曰。前日大難。七人者。我所殺也。獸醫首其事。復殺鵝頭。自是城中無敢謀內應者矣。後獸醫以事出城。鄉民戮之。沛澤卒亦見殺於賊。云。天河生聞諸李芝生曰。張先生上軍門書。率由芝生代傳。三十六函存其廿四。他日謀為刑之。當夫嚴刑逼供之日。豈不知一死無所逃免哉。然而骨肉齏粉。忍死不承。冀萬一獲全。猶有後望。卒用計殺賊多人。而後罷。可不謂烈丈夫哉。機事不密。英傑淪亡。又爽然失矣。

楊漕帥

漕帥楊疊雲先生。善詩。工書法。墨梅繁秀。生動。筆有古姿。居京師時。性不諧俗。衆以迂怪目

之意泊如也。蒞淮後手不釋卷。尤好培植士類。見劉君勤伯及家兄月清文。期許甚殷。震鈞入都時。戒以長安結納。首重黃金。黃金不多。交不深。有志者閉戶讀書。毋庸僕僕為也。防堵揚州倉猝退守。寔為白璧之瑕。時先生年已八十餘。壽考亦足累人哉。

錢江

錢江字東平。浙江監生。小有才。口多大言。嘗客廣東。坐法戍新疆。遇赦回籍。遊說公卿間。當雷公以誠辨理糧臺。駐節邵伯。隸江往投之。歷言用兵理財諸法。公大悅。辟置幕府。相需甚殷。時江北兵勇萬餘。儲精孔棘。公雖以轉餉為職。寔無所措一金。江為畫策。疏請空白部照。勸民捐輸。隨時填發。往往百姓報捐。或踰年不得護符。則意興索然。至是朝納白金。暮榮章服。故富商巨室。踴躍輸將。又立釐捐法。諸賈人未作賣買。精貯諸物。及商以取利者。出入一錢。官取其釐。分別城市大小。居者立局。行者設卡。窮民小本經紀者免。故商賈不病。而大有裨於餉。軍興十餘年。各省仿行。源源不竭。卒成勘定功。其事創行於雷。而其議寔創始於江。嗣後官吏待缺者。視為利藪。設局日多。立法日廣。胥吏僕役。一局數十人。大者官侵小者吏蝕。甚至石米束布。搜括無遺。則非立法之苛。而奉行者不盡善也。雷公既得二策。軍用日饒。公私交裕。又使江與同幕五人。親赴下河督勸捐納。不從者脅之以兵。時人畏之。目為五虎。


江自恃其能。氣燄日盛。屢以言語相侵侮。雷陽服之。而積不能平。一日會飲行營。持議不合。兩不相下。雷忿甚。聲色漸厲。江怒。擲盃起曰。即不然。能殺我耶。雷亦拍案曰。即殺汝。敢有何言。立叱左右牽出斬之。鹽知事張翊國者。英年勇敢。素為江所輕慢。銜之。至是得雷公令。掣劍而行。殘酒未終。江頭已獻。乃以江恣肆跋扈。將謀不軌。入奏焉。天河生曰。論者曰。錢江有可殺之罪。雷公非殺之之人。嗚呼。豈不然哉。宜黃黃樹齋先生贈江詩云。渥渥天馬慎飛騰。終見雲霄最上層。氣概可想惜乎江之不知慎也。予嘗奉檄勸捐。預出空白照示人。鄉民擁貲者見之。欣欣然喜而相告。雖甚慳吝。不自覺其錢之出於囊也。於是服江之才者一。釐捐假手商賈。寔則取諸買物之人。商民轉得藉口增價。故人人欣然。不以為苦。於是服江之才者二。可殺之罪。或亦有天道焉。雷公既坐他事免官。寓居清江普應寺。如素諷經。藉資懺悔。江漢間讀釐如雷。呼公為釐祖。

紀事雜作

初予客豐工。饑民鼓譟。里人傳予被害。叔兄驚愕。馳赴清河。得書乃止。及予抵贛。而伯兄病危。時嚴冬。河水皆冰。陸行還家。幸而無恙。呈叔兄句云。竟與諸昆見。猶將夢境看。傳言互生死。相對失悲歡。世事不能語。吾廬何可安。休為後來計。此會已艱難。聞粵賊入鄂。送友南還。

云乍喜鄉音捷。驚聞漢水圍。江南漸搖動。河北况流離。草木悲生意。山川倚暮暉。鄉園竟何似。淒絕送人歸。江干紀變云。西南雲氣鬱。悠悠戰伐頻。年苦未休地。勢漫憑疆域。險人心先有。亂離憂。潯陽九派從天降。漢上十營縱騎遊。聞道金陵半遷徙。尚書早為堵江流。鯨翻天塹走風塵。虎踞鍾山泣鬼神。千里樓船經劫火。一旬旗鼓犯勾陳。安危半壁封疆寄。遷轉三朝故舊臣。能說聖明輕付託。原將忠義屬斯人。壯懷清節憫時艱。曾列先皇侍從班。涕淚出師真死別。旌旗癘寇竟生還。畫梁春燕巢林木。中澤哀鴻滿市闔。獨有嘉謀能入告。龍恩新自鳳城頒。先是鎮揚軍中。疏陳攻城方略。首恃火器得旨。用雲梯進攻。不許轟擊。致傷百姓。又賊據揚州。大吏請決洪澤以灌之。上軫念窮民。不許。予作避兵詩云。憶昨廣陵破。大吏擅足趨。驚塵動淮海。肩輿交街衢。十千買一舟。半萬買一車。不識誰家子。輿馬紛長途。健兒五六十。執械供馳驅。貧窮亦性命。誰能安故居。跌蹶老攜幼。涕泣妻隨夫。平時閨閣秀。蓬垢走路隅。出門不忍視。白日慘為紆。驚魂魄未定。道路爭傳呼。河臣奏良策。擬決高家湖。兵戈或不死。太息吾其魚。煌煌聖明詔。不忍傷窮閭。感激涕零落。轉歎蚩氓愚。當時禍亂起。萬變頃刻踰。重臣棄疆土。何論守牧餘。忽聞神明宰。乃在清河吳。安集張皇衆。殺戮奸宄徒。夙昔一方望。籌策何乃迂。倉猝失形影。平定功勞殊。石城篇云。石頭城中鬼夜哭。白晝妖狐怒。張目

達官惜死走入城。不許逃亡小家屋。鍾山秦淮忽破碎。黃巾赤眉肆追逐。金銀在壁窮搜求。雞犬與人並屠戮。沿江郡邑悲繹騷。紛紛徵調何其勞。亦有尚方賜刀劍。利刃不斬江中蛟。華屋縱橫走精魅。白日慘淡號山魃。鳳凰麒麟不世出。芝蘭蕭艾同摧燒。或欲飛身叩天闕。虎豹熊羆勢森列。五雲宮殿高復高。浩蕩烟塵蔽日月。但聞白屋供壺罌。幾見丹心誓旌節。長江如龍天上來。潮打空城口嗚咽。江表近况略見一斑。



金壺遊墨卷二

鉢池黃鈞宰天河著

大錢

咸豐五年秋道過清江聞車聲鱗鱗然來視之錢也問何為曰鑄錢曰曷為以錢鑄錢曰帑金不足官府費用無所出今燬制錢為當十大錢計除工費十可贏四五則何為而不鑄是年冬再過清江聞車聲鱗鱗然來視之大錢也問何為曰鑄錢曰曷為又以大錢鑄錢曰大錢不行報捐者買之當十祇值一二今燬大錢為制錢而又小之和以鉛砂計除工費一可化三四則何為而不鑄

車蘭雪

山陰車蘭雪父官懷仁卒於任貧不能歸子雲字少蘭遂為翰邑諸生蘭雪縱酒豪逸有詩才如歲暮句云客如馮煖一無好人似孫登百不能煖作仄聲用也贈友云千里交遊孔北海一船書畫米南宮輓人云黔婁有婦求夫益任昉無兒讀父書皆佳少蘭頗有風骨微少涵蘊嘗寓書規之云士固不可泯忍求容亦不宜辭氣淺露見譏君子猶可相容得罪小人必將致禍無故而得小人之禍情固有所不甘無端而為君子所容我又自居何等生與張

生立齋吳君錦堂皆慷慨磊落士契分交厚故可容納直言

劉李交

秋舫與李君繡谷為總角交長而同學申之以婚姻秋舫性直諒繡谷柔之繡谷和易秋舫勵之故二人相濟以有成秋舫以避債故讀書繡谷齋中追呼者踵至則綉谷為之經營調解一不以聞於秋舫每曰以吾處秋舫事雖甚煩劇而無所動於心若秋舫自理之則神明棼亂欲靜心力學難矣繡谷已事或不治秋舫亦竭力赴之訓之如弟不以為嫌也家室中間有齟齬則眷屬互為勸慰務使和順而後安及秋舫病危繡谷適教讀梁方伯署十日不得書心疑之已而書至非秋舫筆益憂慮未幾果得訃聞病中拍牀相念以不得一見為恨則淚下如湧泉又避忌不能放聲哭襟袖皆溼每授弟子詩至伐木谷風諸什及史籍所載朋友交誼死生契濶之故輒哽咽不能止方伯課子素嚴終歲無間日至是感繡谷意趣歸里以抒其慟既至先詣劉氏撫棺大哭而後返於室已為卜日視窀穸言於富室厚賻之存典取息為秋舫妻女度日費又輯其詩文待刊焉繡谷故善書屢試京兆躍然將復往至是屏棄楮墨絕意進取後數年亦卒鉢池山農曰予浪遊南北近十載所見友朋交際如劉李者蓋鮮求以酒食徵逐群居笑言始終無間不及於利則今日所稱道義之交矣古有范張

今有劉李。違衆獨行。宜其死也。

祈雪

清河冬旱。待澤方殷。一日予訪勤伯於縣齋。吳公留飲。時杲杲日出。大寒天氣如小春。席間出祈雪詩見示。中有省躬自知下吏罪。回天妄冀明神慈等句。愷惻之忱。流於言表。方談笑間。片雲自東南來。頃刻彌漫。則六出花飛。漸積寸許。公自詣庭階。圍雪與公子為戲。衆皆異之。謂滕六大顯神通。翌日。予往鍾吾。自桃源以西。晴朗如故。不謂為誠感不得也。

銅廠

雲南銅鑛。夙聞之。不悉其詳。錢塘吳仲雲官滇時。有廠述四首。具見利弊。節其要云。華楹具百戲。雕俎羅八珍。指使諸僮僕。佩服麗且新。問官所職掌。曰銅鐵錫銀朝上一紙書。暮領十萬緡。會計足課額。可以娛嘉賓。勿謂官豪華。視昔官已貧。頗聞有某某。憑陵居要津。積金北斗高。歌舞難具論。歌舞豈不歡。世事如轉輪。朝廷固寬大。國法亦以伸。事過三十年。殘魄含酸辛。官今當罷勉。富貴天所令。鳩厄與漏脯。智者終逡巡。哀哉銅山下。乃有餓死人。其滇廠四十八。寶路區瘠肥。媪神豈愛寶。苗脈有盛衰。攻采矧云久。造物亦告疲。甯臺與湯丹。二廠最大今亦非曩時。小廠益哀竭。徵課檄若馳。何從獲硬破。硬謂之磚。石堅為硬。破硬則可久。獲大礦。間或得草皮。浮淺

而少者為草皮礦鷄窩不滿萬雞窩出餓鞘亦何為餓鞘無長莖入龍窟水洩費不貲有積水百

龍拉年年告缺額呵斥安敢辭我聞古銅官坊治各有司方今吏事繁難理如亂絲况復昇殿

政殿最較銖銜既耕復使織誰能劑盈虧上瞻九府供下給家室私官私兩不病治術其庶

幾其受事平其爭厥長凡有七有客長課長爐錘手與砂下是皆長所帥有犯則扶之晝夜

戒無逸帕首縛一登行若緣縫蝨仰攻亦俯鑽但懼引線失風穴竅益饒入深苦悶廂木架

疏密是為一廂廂廂每二尺餘支木四龍驚地軸裂一入不復出悲哉乾蟻子枯腊黑於漆則陷

或為寶氣所養屍更聞扯火勤爐罩難畢述亞煎礦曰扯火煎藥板用美人爐鑿殺用紗帽爐

不腐名曰乾蟻子罩黑銅蝦蟆罩爭尖與奪矜刀劍關狂獍異線開采而同一一朝烏獸散探胠入民室索

之藉無名山菁費窮詰持以問長官鎮撫用何術其廠主半客籍逐利來窮邊入官報試采

自竭私家錢欣然大堂獲繼以半火煎礦旺曰大堂晚抽課得美餘陶荷不足賢百貨日賡

集優倡肆妖妍荒荒蠻瘴中聚若都市聞者饒涎垂擾擾蟻集羶叩囊出黃金一擲虛水

填所願倘不償家室徒蕭然妻孥難存活伴侶空相憐不如扶犁好猶得守薄田請看足穀

翁饑飯飽即眠其世人第愛孔方豈知孔方來歷如此艱難彼視錢如命者知之矣

鐵鑪

滇南銅廠既不旺。又以長江賊阻。運載維艱。乃議於熱河。試行開採。得銅三萬餘觔。銀礦升課銀萬兩而已。扎拉芬太試煉鐵礦。入火不落。時戶部鼓鐵鑄錢。待用孔急。於是設局採辦。計兩年買鐵一千三百萬觔。而鐵錢遂行於都中。較之當十以上者。民轉便之。同時皖北行用小錢。鵝眼。縱環。復見於世。百錢不過二寸許。第出省即不行。馬蘭鎮並鑄銅鐵大錢。協濟兵餉。兵丁行使亦不便。小既不行於遠。大又不適於時。可知錢帛自有定衡。不然利之所在。孰不趨之哉。

祖錢

宗侍御程辰有變通錢法一疏。大意在尊制錢以平銀價。擬以順治康熙之青銅錢。照廣西及湖南衡永等府。行用桂字錢之例。以一文當兩文。即抵銀兩釐。雍正乾隆黃銅錢。抵銀一釐五毫。嘉慶道光及近日所鑄和鉛較多。抵銀一釐以上。皆定其稱曰祖錢。輪廓無缺。概作銀用。上行則完賦報捐。下行則給俸發餉。昔謂無銀者。立變為所在皆銀。則銷化制錢之徒。不禁而止。擡高銀價之弊。不期而平矣。所議似甚通達。錢法之貴乎適中者。慮私鑄多而利權分也。如此則私鑄必不得利。顧所難者上行耳。

鈔票

軍興之初。釐捐法尚未通行。饒糈時絀。軍士有脫巾之慮。司農則仰屋而嗟。乃議製鈔票以濟之。而南河先請數萬。其色以堅厚白楮。界為兩方。飾以紅綠。上方具載通行條令。下方載銀數年月。以代河餉。河員得之。與大錢之當百當五十者。分發各州縣。富貴典商。易制錢。商賈無所用。則責諸報捐之人。十錢祇值二三。自捐局以外。皆不收。非惟民不信官。即屬員亦不信長吏。故曰難在上行也。而無本之券。不待言矣。

張保

閩浙海盜最劇者曰蔡牽。張保。牽前就戮。海洋安謐者久之。及保猖獗。屢勞王師。力竭請降。授官至參將。先是粵督百齡公。貽上元董益甫先生詩云。嶺南一事君應羨。殺賊歸來咬荔支。至是先生覆書云。昔蒙贈詩。當改一字為撫賊歸來也。百公默然。保供職既久。有擬薦擢總兵。以示羈縻者。桐城姚石甫觀察言於大吏曰。保無尺寸功。窮蹙乞降。官至三品。國恩寬厚至矣。再加遷擢。何以服奸宄。不如以海洋緝盜責之。有功則遷擢。不為濫。有罪則降謫。不為苛。保卒以此計奔走海上而死云。

門外漢

長洲彭詠莪相國。未由館選。初被協揆命。謝恩摺云。登揆席而未經詞館。計本朝不過數人。

由部曹而游陟綸扉在微臣甫逾廿載宿南廳帥石芝太守云舊制大學士蒞任皆詣翰林院署入登瀛門降輿諸後輩長揖迎之先是有某公者亦未經館選而大拜將至院署諸詞林序立門內以待而某公於門外降輿拱手自稱曰門外漢也

伶人

京師宴集非優伶不歡而甚鄙女妓士有出入妓館者眾皆訕之結納雖伶微歌侑酒則揚揚得意自鳴於人以為某郎負盛名乃獨厚我伶恃嬌態飾風雅聞有書畫名者必索之某公善書工花卉酬應日煩厭苦特甚一日有巧伶索畫伶故以色藝噪一時他人所欲結交而不可得者某乃自出買絹欣然搦管聚精會神惟恐不工且速也既成冒雨攜贈伶道謝曰我戲言耳乃竟煩公某甚喜謂自今納交庶幾心藏不忘矣越數日復往一語不發面冷於冰久之乃請姓名若不相識者某恚而返自是痛惡伶人

帥石芝

石翁言其先人承瀛公官京師時遇有文酒之會呼召優伶者必不赴不知而至則入座輒遁同列強之卒不顧此與上元董制軍教曾赴江督宴聞劇不入金華戴司寇敦元赴浙撫宴攜織獨歸同一清德近有某公略相類特時流不笑其迂即嗤為怪非人情不可近一語

蔽之矣。又自言官袁浦時。職位微薄。未敢峻拒第耳。不聽聲。目不視色。終席而散。不交一言。亦可謂和而不流。善處時俗者矣。時桃李再花。苗麥冬寔。節逾長至。蟲飛薨薨。石翁五十年未之見也。

烏塔二公

廣州都統烏蘭恭公。謀勇兼備。屢著戰勲。略載浪墨中。顧性急氣盛。時時涉險。輕賊同僚。或戒之。則曰。人死。不盡由賊。不見賊。亦不必長生。人人明哲保身。誰為捐軀報國者。最後與向公合擊仙回嶺。大雨不止。軍士餒甚。議收隊以待。明日夜五鼓。陰雲如墨。都統忽自率小隊入山。掩賊不備。向公聞之。疾飭諸鎮接應。山徑崎嶇。未及列陣。賊眾冒死衝突。致陣亡總兵四人。都統竟以骸中流。礮而薨。天下惜之。都統薨。而麾下火器營護軍塔齊布公。以敢戰著。勇略埒於都統。每臨陣。背火銃一。腰刀二。手長矛套馬竿。怒馬獨出。戒親兵不必從。從亦無能及者。尤好逼近賊。砦覘形勢。見賊輒努目切齒。口角流白沫。若將生啖賊者。賊自金陵。泝江而上。通道於湖南。冀與廣西老巢聯為一氣。公以千數百人。破賊十倍於湘潭。殲斃礮斃溺斃以萬計。賊始沮喪而返。最後率壯士二十人。助攻小池口。馬驚失道。鄉民和公名。留匿其家。時歲除前一夕也。至明日。大營進。公不歸。馳騎偵之。不見。洶洶失所倚。夜半忽聞鄉民

送公至。諸帥驚喜。既而出迎。握手相勞。苦公第曰。饑甚。速飯我。各營軍士聞之。皆躍出。歡聲如雷。飯罷。已元旦矣。其為時所倚重如此。未幾。以積勞氣脫。薨於軍。公少於都統數歲。卒年未四十也。

浦上園亭

六年丙辰春。讀書海道署。署之東有小園。早暮行吟。廊迴檻曲。板橋疏雨。春漲初生。度橋循水榭而南。為文閣。池北有軒。翼以山亭。額曰蓮湖理楫。前觀察周君聽松筆也。浦上園亭。以河帥署中為最。池廣數畝。疊石為峰。有荷芳書屋。聽鶯處。恬波樓。頗極水木之勝。張公芥航督河時。與同人觴詠其間。傳為韻事。其後麟見亭先生愛士喜詩。猶有儒雅風流之概。近日徵歌角飲如故。而風徽遠遜前人矣。

魚龍

民有得魚。長不及尺。金目而廣鱗。將烹。隱隱見四足。或曰龍也。懼而放諸河。臘八日。雷震。龍見於西南。談者謂迎此龍上天也。

小兒

邳州人。負一小兒。兩首共頸。胸腹不分。四臂兩足。面相向。欲見者。人與數錢。或白縣令。答其

人而逐之。此則弟輩目覩與談龍者異焉。或問邗人曰：兒若所生耶？曰：然。曰：罪不在賢跛足。

胸陽士人某妻跛一足。伉儷數年矣。及登鄉舉。而年未及壯。自念前途尚遠。世固有跛足夫。人哉。朝夕折磨。妻以志鬱死。續娶某氏。姿亦平等。雖凌波穩步。而積有違言。已而士有母喪。州尊往弔。急率子弟趨出。跪送。將踰闕。自履其衣而仆。及起。腰足腫痛。不良於行。自是拄杖出入。居然跛矣。

附軍營近事十六則

五采帆

官兵之再復武漢也。沿江賊檣林立。逆酋驍健者。以五采飾帆。粲若雲錦。楊提督載福分水師為兩班。上下抄擊。並懸重賞。能獲賊五采帆者。錢十萬。軍士奮力駛入。頃刻獻采帆六。賊勢不支。縱火焚之。延燒火葯大船。霹靂一震。眾船皆飛。血肉雨落。賊屍有墮至對江者。

鐵鎖

蕪黃以東有半壁山焉。孤峰突起。俯瞰大江。一夫當之。百人沮蹙。賊於山下置橫江鐵鎖。

四道北達田家鎮護以木牌夾江築堅壘以守羅公澤南率諸軍攻之賊酋坐將臺督戰龍旂黃蓋勢張甚公戒士卒勿輕進待賊銳既竭突起急攻賊多觸石墜崖死水師乘勝以洪爐大斧鎔鑿鐵鎖燔賊舟以千計火光夜照數十里賊潰田鎮平

仙桃鎮

鎮屬沔陽同知林天直攻之殺賊方酣突有悍賊偏體插刃繪面挂髯掙猛若厲鬼馬上手長矛狂呼入陣烟霧迷漫中遙望從賊有躍身空際高至數丈者紛紛然飛舞上下米色爛然我兵駭異天直倉皇搏戰碎受重傷而死事後詢之逸賊則拋擲婦女衣服以疑之又縛少女長竿上艷裝綵服佯作指揮狀不知者遂驚以為神

蛇山

粵賊三階武昌副將王國才自九江率隊來援夜半抵省不知城之已失也呼於望山之門賊啟門納之亦不知為官兵直至蛇山前彼此問訊始悟殺聲大起國才慮孤軍深入寡不敵衆且戰且退退至城外結營焉

指配

賊據金陵立女館以廣西蠻婦監之夫妻母子不得見及賊糧將罄盡驅無色者出城刈

稽寔則縱之使行。踰月。又下指配之令。設偽媒官司其事。凡男女年十五以上。皆報名。高格者配至十餘人。以次遞減。然祇許月晦同宿。餘日不得犯姦。或老夫得女妻。或孩童獲鳩母。顛倒抑勒。飲泣含冤。上元吳家楨詩云。六軍女館重關防。廿五嬌娃聚一房。輪盼今宵逢月建。滿城飛徧野鴛鴦。指此事也。令初下。投環墜井。自刎服毒者不可數計。予友俞述之訪其姓氏。已及九百餘人。

義妓

癸甲撫談載揚州朱九妹年二十。才色雙絕。兼善書算。賊得之獻於秀清。寵愛備至。朱私誓不與俱生。暗以砒霜毒之。未遂而死。近聞金陵李氏女。選入偽宮。藏寸許小刀於髻內。伺秀清被酒酣睡。直刺其喉。秀清適轉身。誤中左肩。立呼左右剝女皮。懸竿焚之。烈哉閨閻之英也。獨秦淮妓女王憶香者。為偽都督施姓所得。佯為歡笑。醉以酒。抽刃殺之。而自經於後樓。則尤為罕見者矣。

考試女子

粵賊脅令士子應試。亦分別鼎甲翰林諸名目。花冠錦服。鼓吹遊街。少有知識者輒逸去。後又考試女子。取傅善祥為女狀元。榜眼鍾氏。探花林氏。招入偽府。令掌簿司批答。

陳氏女

南方女子多善文。北方女子多善武。風氣使然也。賊將黑力虎者。驍健絕倫。及入河南。有蔡姓占卜者。謂曰。北去逢溝。必喪大將。賊不聽。恃勇獨行。明日。抵陳家溝。遇教師陳翁。率二子環而攻之。搏擊良久。陳父子敗歸。賊追至其家。相距數武。望見陳。已入後室。忽門右突出一鎗。直刺其股。則一女子。年祇十六七耳。賊仆。梟其首而埋之。

女賊

女賊蕭三孃。偽稱元帥。年二十餘。長身猿臂。能立馬上。左右射。鎮江失守時。率女兵數百登城。見者駭異。又蕭朝貴妻洪宣嬌。亦騎馬臨陣。第祇作壁上觀。不能交鋒。或云蕭三孃即朝貴妹。與其妻皆侍秀清。洪逆明知之而不能禁也。

男妾

賊擄幼童年十二三以上者。六千餘人。盡行閹割。而誤去外腎。死者十六七。秀清選其姿色秀麗者。傅粉裹足。着繡花衣。號為男妾。如侯裕寬。李壽春。鍾啟芳。王俊良等。皆極妍美。有巧思。能以側媚得諸逆歡。久而出入簾幕。漸與偽妃媚通。狎褻幾不堪言。諸逆縱之以為樂。

妖術

賊衆臨陣。詭秘百出。官兵疑有妖術。寔不盡然。惟湖南徐某素習辰州教法。從賊為軍師。臨城對壘。屢攻不破。即用方桌數十。疊架為壇。披髮仗劍。禹步焚符。謂之借霧。旋有雲氣騰空而起。離地二三丈。官兵自上視下。模糊不可辨。賊遂乘勢仰攻。其後徐某及徒黨二人震死。開封城外。

諸色人忠義

舟子阻行。妓女進毒。前已略載一二。又開封藥肆王謨者。素善擊刺。當省城被圍時。奮身躍出。與一紅衣賊短刀相接。良久未決勝負。榮升班伶人胡姓見之。持矛而下。乘賊不防。直刺其胸。刃出於背。旋有綉龍巾騎馬二賊奔至。王胡鼓勇直前。復斃其一。江南僧衆恨賊毀滅寺宇。糾集數百人。伏山谷間。伺賊出入。約期並舉。會為偵騎所見。殺戮無噍類。杭州錫箔匠集黨乘賊散竄。追殺多人。江甯南門外朱商。聚集義勇。協力拒戰。亦殺賊千餘人。及賊勢日衆。乃各避去。懷慶監犯自言能視草色。破地雷。沿城掘得十數處。皆用絲被包裹火藥。多至石許。以竹竿暗通引線於數十丈外。表明府請免其罪。以銀兩衣服酬之。此固惡貫滿盈。普天共憤。抑可見鄉民食毛踐土。尚能激發天良也。

易伏

九江賊出西壩伏隊於八百坡後之茶庵李廉訪續賈帥兵繞道譚家坡先敗其伏而伏我兵於其處回隊迎敵且戰且走將至伏所賊不知其伏之已敗去也意氣揚揚以為得計及伏起乃見官軍倉皇潰奔掩殺無算。

石鐘山

山在湖口縣扼外江內湖之要賊眾悉銳守之我軍水師為所間隔者三載有餘李公遣將力攻湖口調湖內舟師冒死衝出結陣於山前公自率偏師揚言進剿宿太間中道折回乘夜渡江繞至湖口山後搗其偽城燔石鐘山賊巢巖壁皆赤賊至死不知此軍何自來也。

鳧雁

向張二公追賊金陵城外大勝者十餘次鄉民不知戰略事後跡之但見頭顱墮地如落瓜屍骸枕藉如束橐隨潮出港泛泛如鳧雁而已。

反令

揚州曹孝廉從軍皖北言主將馭兵極寬賊之掠營而過也主將下令曰急出隊三令而

士卒莫有應者。則反令而止。士卒採民墓木為薪。民曰：毋擾我墓。我給若薪。不聽。互相爭鬪。營中洶洶。將往助。主將下令閉營門曰：敢有出營者斬。三令而士卒踰壘而出。則反令而止。

鄭通判

廣東顧竹城同年攝長洲令。有福建鄭通判者。以盜劫財物。父被殺死。擊鼓鳴官。問被盜時。通判何在。曰：前一日出門探戚。今晨甫歸。息足茶肆中。遽聞此信。故來報。父名揚旌。由舉人兩署鎮洋嘉定縣事。時罷官僑寓蘇州也。顧即往驗。揚旌裸身仆廳上。腦後刀傷入骨。腰骨間復有數傷。徧搜樓上下。無他形跡。將出過井上。蕉扇浮焉。左右起之。血污衣袴。咸在。顧心疑不類盜殺狀。命通判棺斂其父。而使人陰往覘之。草草無戚容。密召所探戚至。亦謂通判寔未往。明日盡拘寓中人。訊諸內廳。嚴刑以待。多方誘脅。始各吐寔。則揚旌之死。通判弑之也。揚旌性吝嗇。待家人奴僕尤刻。衆僕語曰：家有一條釘。不隨鄭揚旌。其致怨如此。通判疑父多金。乞取不與。寓主人周氏貧而求助。亦不應。僦居宅內。西偏。蘇人朱甲者。賣綉為生。揚旌又短其值。通判知二人心怨其父。乃與朱甲謀。使周氏助已殺父。共分財物而逃。及期。揚旌方避暑。獨卧廳事中。通判乘夜啟門入。朱甲與周各手器械。而通判自握長刀。搗其父。

帷父張目躍起曰汝喪心耶奪路而出周氏橫械當門繞屋三匝將上樓其子自後砍之仆
甲繼以挺挺短不刃通判慮其不死也又加刃焉獄具通判凌遲速朱於杭州與周氏斬絞
有差問所得則百五十金而已鉢池山農曰石言豕立不為妖狐鳴鬼嘯不為孽是乃真妖
孽也其人則閩其事則蘇宜其亂已

吳逸香

佛雲以眉子硯故名所居曰硯綠奩寶之若拱璧已而攝令吳江適為小鸞故里下車大喜
即訪葉氏後人修墓立碑招魂取影並刻其疏香閣遺稿而以同人題詞附之曩所謂緣於
今乃驗集中題南北曲者祇予與琴川吳逸香女史二人逸香作音節悲涼風神絕世晨夕
諷誦自愧弗如嘗屬錢君吉生作聽真圖以識嚮往詞云塵海滄桑如過鳥往事憑誰弔仙
雲跡未消千古傷心美人香草一硯認前朝是名媛當日閨中寶婦步有時對明窓閒譜遊
仙調有時捲疏簾戲將眉葉描你看櫻桃開落幾昏朝又是寒食御風斜照誰解道昇天成
佛任逍遙祇憐他曇花幻影增悲悼醉扶落日松陵古道歎荒烟蔓草遺塚蕭條桃花三尺
艷魂銷垂楊幾度唳鶯老春山翠黛秋風野蒿綠波明鏡羅裙細腰珮珊珊應有芳魂到羅
袍遇這謫仙人讀生香舊稿一片石珍似瓊瑤仙魂招取把亭亭倩影描又護得孤墳好硯

綠奩裡憐才懷抱仗海內詩篇把幽恨銷_好愁紅慘綠知多少誰值得才人傾倒也算是
薄命青娥有下梢_好嘗於淒風冷雨木葉打窗時按拍歌呼輒為墮淚何其哀感之至於斯
也

性理

童試之有性理論自陸建瀛疏請始也咸豐初朝廷嚮意理學建瀛疏言學臣考試宜增性
理論一篇以示明心重道闡發聖學之意章下直省學政者為令豐工再決之歲上命建瀛
視河駐工次建瀛知南河積弊深所在頽敝即工成終不可保而粵賊初犯湖南距江境遠
自請獨任討賊豐工付諸河臣十一月奉命七日而返金陵調饟徵兵歲暮就道歷二十餘
日甫抵九江粵賊大隊已至前鋒未及結陣而敗建瀛遽斫維鼓帆東下乘暮入省垣時諸
生待試者琅琅然高誦性理未休也其後建瀛子東垣官江蘇同知避寇江陰與百姓爭道
鳴其爵里眾曰汝陸子耶求之不得乃自首也競前捶之而斃或曰性學之興客有著說迎
合建瀛者投契逾分由是挾總督以令守牧橫行於邑中蓋陸以性理獻而言計遂客即以
性理投而權勢行宋儒之饋餉厚矣哉

南行

予浪遊數載。惟丁巳度歲家中。鄉黨清况愈甚。延及夏五。家兄叔丹。招同戚友會飲。時風雨
慘淡。氣寒如早春。感賦絕句云。庭陰微覺酒盃涼。風定遙聞麥隴香。同向綵絲求續命。滿城
寒雨度端陽。後三日。將赴雲間。道過揚州城外。紅樓盡成焦土。存五律一首云。江北繁華地。
昇平二百年。暮城魑魅隱。危岸觸樓懸。萎樹無棲鳥。新收有斷煙。似聞殘照外。笳鼓動江天。
時瓜鎮均已克復。迥非舊觀。瓦礫荆榛。淒涼滿目。三汊河經高冥寺故址。句云。南狩行宮佛
寺旁。斷垣殘碣入蒼茫。江沈塔勢連雲暗。營接潮聲帶雨狂。世上蟲沙歸浩劫。法中龍象誤
空王。幸看大地山河影。重被中天日月光。又由瓜洲放舟至鎮江。云。六年梗絕瓜洲路。浩浩
滄波戰氣昏。火燼樓臺銷毒霧。潮迴雲日見江村。却看鐵甕帆齊指。未到金陵氣已吞。從古
進賢蒙上賞。黃金應鑄向軍門。常州城外聽人談。軍中近事云。月照千營雉堞高。清尊美酒
泛葡萄。珊瑚枝葉皆金玉。鷹隼風塵一羽毛。談笑得官驚婦孺。亂離行路畏錢刀。星垣昨日
詞曹出。猶說宮廷旰食勞。將別蘇州答友人云。虎邱山色對蒼茫。風物清和野興長。縱酒漸
為時輩棄。斂才方悔少年狂。雲霄唳鳥誰能聽。溪澗遊魚盡可傷。瀕海孤城在天末。逝將高
詠寄滄浪。青浦道中云。揚州城郭白門山。處處烟塵物力艱。終是江南風日好。綠疇如畫結
棹間。時咸豐戊午五月下潯也。

長蛇

粵賊殺人如草。卽物類遇之。亦無有免於死者。習慣使然也。江甯陳丙爲賊所掠。與同虜十數人。閉之館中。大蛇出於壁下。長幾二丈餘。有雛賊年十五六。揚刃將下。丙護以臂。蛇竄去。賊曰。汝庇蛇。卽斫汝。丙曰。必不可免。無所逃命。乃笑曰。戲耳。扑以刀背而去。是夜丙夢長身青衣者語曰。賊以某日出隊。視其外貌。雖惡厲。而中心怯亂。其防範恒疏。君擔行囊尾其後。必可免也。及期。丙從門隙窺之。則雛糧衣服。行灶器皿。擔具以從者甚多。如官兵之有餘丁者。丙悟。趣同人。襪被打包而出。出者半。畏賊而不敢行者亦半。賊衆目之不問。及門。門者亦不詰。丙心竊自喜。顧念賊衆北行。必與官兵接戰。而已與諸人者。日暮途遠。惴惴然不知所往。忽見大蛇出自草間。昂首視丙。向東疾竄。約及十數步。又回首候丙者。再丙與同人姑從之。竟免於難。

犬

五月望日。河帥行香回署。文武員弁咸集。有犬啣物。搖尾而入。兵役嚇之。不出。竟置諸大堂。而去。衆往視之。則小兒首也。李春帆曰。犬畏人者。今其目中無人焉。袁浦其亂乎。感澤曰。是或有冤。惜乎犬之出也。不使人窮之於所往耳。

賊酋內亂

向大臣退守丹陽。病薨之二月。金陵賊內亂。先是楊秀清矜功攬權。驕恣自大。日以聲色誘洪逆。深居偽宮。奉之以萬歲之名。禁不得見人理事。而秀清稱九千歲。諸偽王以千遞降。賊衆且憚且嫉之。至是秀清欲自稱萬歲。使左右言於洪。洪曰。何以稱我。秀清不得已。乃減為九千五百歲。是時偽北王韋鎮偽冀王石達開。方率衆分擾江楚間。達開較諸賊少善。素不直秀清所為。鎮前自皖南敗歸。秀清不納。奪門而後入。故憾之尤深。洪逆既為秀清所制。恣其相逼。日甚。密召二酋圖之。而鎮適先至。佯與秀清約議事於天主堂中。預戒甲士以擲盃為號。酒半。發兵殺之。又盡殺其黨羽。而各室其室。及達開至。曰。秀清可誅。其屬何罪。鎮亦酷矣。鎮怒。更集衆欲殺達開。達開數曰。一山不能容兩虎。況豺狼狐鼠同居哉。吾不忍自相殘害。使人以草寇笑我。即帥所部乘夜潛出。沂江而上。自是別為一隊。歷楚粵閩浙。而授首於四川。其後秀清親屬攻殺鎮。閉城二十餘日。屠戮甚衆。城賊屢驚。設使向公而在。蹈瑕抵隙。倍易成功。先後數月間。失此機會。惜哉。

北軍凱旋

直隸靜海之賊。由阜城竄保高唐之馮官屯。屢為僧王所敗。洪逆遣隊北援。又殲於豐單之

間勢困甚。王命築套堤引河水以圍之。屯中糧盡。賊無固心。大兵晝夜轟擊。遂破其壘。生擒首逆林開芳。及諸偽職。監送京師。凌遲處死。從賊無一脫者。北軍行凱旋禮。大將軍參贊大臣恭繳印信。京城撤防。在事文武。賞賚有差。賊之初起也。投琫佛寺。有見僧即止之讖。至是果驗。天人合發。固非偶然。

金壺遊墨卷三

鉢池黃鈞宰天河著

奇女子

軍興以來豪傑之士摩厲戎馬間建功立名。人才輩出而世間奇女子不願以閨幃終老。若予所聞杜氏女者。乃亦以勇略著於時。杜名憲英。河南人。父為名諸生。藏書數千卷。幼從少林學拳法。技擊絕精。及生女。愛若掌珠。盡以藏書及拳擊進退諸法授之。女亦聰穎。自輯古今兵事為一篇。藏之枕中。父病。戒之曰。吾晚得汝。不及為汝訂婚事。汝母年老。須自具特識。參決可否。百年事重。勿使人間小兒女羞澀不言也。遂卒。母自外家見兩生。一周一鄭。才品相類。皆內親也。密商於女。女歎曰。文武兼備。世罕其人矣。鄭當以文學進。而無大成。就周福較厚。特武功耳。母曰。河決年荒。盜賊四起。武亦良善。遂字於周。既嫁。伉儷甚篤。踰年而粵賊北犯。開封。以大隊攻城。而遊騎四出。擄掠。開歸。間置。然不寤。周集鄰村二百人。夫妻分為二隊。領之。二人者又各分其隊為二。二正二奇。賊至。初見數十人易之。直撲女陣。女佯敗。退至叢林間。周突起。大呼於林東。賊方錯愕。其西路銃礮又作。山坳木杪。旗幟飛揚。不可數計。賊大驚潰。距叢林四里許。故有破廟。廟中伏兵伺賊。過復譟而出。倉皇追殺。如宰鷄鷄。女縱騎

獨追騎馬賊酋戰數合。顧女而笑。女亦笑。乘間以長鎗刺其腰。傷脇墜馬。憤而大吼曰。左山虎三十年驍勇。豈意死於女子。為兄弟笑哉。時衆賊去者已遠。日已近暮。鳴金收隊。而周生窮追不止。偵者謂馬陷泥淖。蹶而被執。察其衆。合少四人。女怒。率二十騎飛馳救之。不及。賊已縛生入營矣。女乃返視山虎。創不深。猶可支柱。急取創藥傅之。親裹其傷。又饋以酒食。而置毒其中。殷殷然勸餐者。再且曰。吾謂君泛常賊。今乃識為英雄。陣上不能相讓。君合諒我。扶之馬上。使人送之。距賊營里許。而後返。山虎歸營。極贊女賢。不恨而轉感之。以故釋周生。縛使掌簿籍。得不殺。明日。山虎毒發死。村人請於女曰。縱之歸。而又置毒。何也。女曰。飲我之刃。而虛言慰之。其感激可暫。不可常。久而念怨。終殺吾夫。使之踰時而亡。則他賊不復措意矣。皆服曰。非所及也。女候生三年不歸。杜母又歿。乃以錢數萬買得一婢。潤面長身。膂力甚壯。教以武事。從己出遊。阜城連鎮間。密訪周生消息不得。又由皖北間道至江南。一日泊舟江港。有富室子弟。結商人賁貲販運。而冒為士人。赴試杭州者。繫纜於女舟之左岸。上一僧寬衣大笠。趺坐擊木魚。別以短杖擔衣鉢。置之身旁。目眈眈視女。轉視羣商久之。太息去。遠聞齋粟數聲。已而岸上有二三人。散步徘徊。羣商方欲結納士人。為偷漏關稅計。揖而邀之舟中。煮茗閒話。各通姓名里貫。已。士人縱論天下事。雜以文字科名語。農商語。兵語。青樓

諧謔語。羣商於賣買經紀外。瞪目不能發一辭。士人曰。我輩一見如故。意氣亟相得。公等果將赴試者耶。一商曰。寔不相欺。薄有賞貨。前途關卡多。仰藉大力庇蔭。得免稅金。抵浙必厚報也。士人曰。飲啄前定。萍水因緣。此小事。何論報乎。拱而別。注目女舟。羣商返舟。喜甚。各以言語相調笑。亦目女。時婢在後艙假寐。女怒。自語曰。身死財喪之。不知猶竊視人家閨眷耶。商聞大驚。密語久之。疑女為盜船。長跼請救。女哂曰。吾船無盜。適與君等共語船中。及向之跌坐岸上者。乃真盜也。君等家擁鉅資。日處醉夢中。不見天日。豈知世路險巇哉。衆諾諾。又曰。處世需才。即兵戈擾攘中。挾貨遠行。亦非大有才者不可。苟自度無其具。寓坐閨中弄稚子。毋以買命錢。空餌虎狼也。今身死財喪之。不知猶竊視人家閨眷耶。商曰。且為奈何。女呼婢出曰。此吾前鋒燕支將軍也。諸君畏怯者。請避岸上。否則安卧以待。慎勿露聲影。吾二人盡力當之。視諸君時命何如耳。及夜。又聞齧栗聲甚近。女曰。是矣。羣商不敢出。亦不能卧。急閉艙門。滅火屏息。團縮榻上。時下弦殘月初出。繁星麗空。略辨人影。兩岸蘆葦風瑟瑟作聲。女念迎鬪。則彼衆我寡。不易制勝。不如待其來。出不意以刺之。與婢約曰。昏夜不辨彼此。以髻上明珠映月光為記。未幾。賊果先登商舟。前二人不可識。其第三人顯然僧也。昂首四顧。遽奪商船門。女手利劍。徑前刺之。應手而仆。其二人大叫曰。上則競趨女舟。女揮劍旋繞如練。

婢手雙鐵椎自女後突出。光耀上下如毬。賊方避劍。不虞婢椎之出也。左右撲刺落水。死麀鬪方急。商船後艙呼賊至。婢躍登蓬頂。左臂適中賊槍。忍痛棄椎。易刀連斫之。賊亦負痛狂奔。東西分竄去。於是發火四照。船頭蓬頂皆血漬。諸商聞言始出謝。人人面土色。女叱之去。使婢裹創卧。而獨坐待旦以備之。明日將解纜。逆風大作。及午。有樓船十數。自上游乘風而來。亦泊港外。諸商大驚。謂賊眾復讐至。探之。始知某營總兵官王姓帥師巡緝盜賊者也。軍士先詰商船。諸商曰。赴試曰。赴試何以載貨。毋乃盜乎。商曰。我非盜。乃遇盜幸免者耳。次詰女。船女未及答。商曰。是即殺盜救吾屬命者。軍士見兩女子無一男丁。羣商又不類士子狀。疑其踪跡。瑣瑣盤詰。女怒曰。何必多言。我乃手殺左山虎之中州杜憲英也。問我何為。語未畢。忽有一人自船頭躍而登女舟。問曰。杜家英娘何在。女茫然無以應。其人又曰。英娘不識我乎。女目之。方面偉軀。貌似相識。而鬢鬢有鬚矣。其人曰。我即河南周生。與卿為伉儷者也。今帥兵緝盜過此。不意遇卿。女猶不敢遽應。周乃曰。卿不憶嵩山射虎時耶。女曰。弓衣金彈何在。周曰。置之洛水犀腹中。蓋當時閨中隱語。問答既合。女不覺泣下曰。妾為君子力已至矣。幸神明垂佑。相見於此。願何以不周。而王也。周乃告以被虜後說。賊投降。主將王公愛之。使從已姓。授守備。從征江皖。歷保今職。賞花翎。賜勇號。且以提督記名矣。周問女何時渡江。

婢為何人。女言未半。諸商請見軍門。叩首船頭。謂受夫人活命恩。願獻五百金為壽。女堅不受。謝之去。屬以後此小心。不能復遇我矣。諸商皆感泣。周生既了巡緝事。即日引疾解官。攜妻偕隱高山。讀書種菜。以為樂。婢歸。適某千總。勇過其夫。所稱鄭生者。以秀才終。

武殿元

鹽邑有武殿元者。性嗜酒。曠唱後朋輩招。遂深入醉鄉。明日。兵部將引見。是夜猶與酒朋鬪。飯及期。匆匆策騎往。適西華門外居民被火。道梗不得前。繞道而進。則駕已升殿。某以誤期革去狀頭矣。或云其友忤而誤之也。

某孝廉

某孝廉家資鉅富。公車北上。廣謁諸名公。結為師生。竟以關節成進士。欣欣然有更上一層。獨步瀛洲之想。部署停妥。十得八九。而費已不貲。一日有小內監。年甫十餘齡。微聞某事。使人預致賀意。願得喜酒而醉焉。蓋意存挾制。欲索多金也。某念事有成議。彼何能為。竟不允。閱日殿試進呈十卷。內侍乘間曰。外間傳言。今科一甲一名。為某縣某人。若年幼而無心出之者。及開卷。果如其言。於是狀頭不成。並進士舉人皆革去。海屬人言之甚詳。第不識為何時事耳。感澤曰。孔方先生。廣大神通。由來久矣。然欲以銅臭之力。遽躡清華。且不作第二人。

想母乃太過乎哉。以人之幼穉而輕之。而已成之事。即敗於所輕之人。誠非意料所及也。君子曰。過猶不及。

奇孝

婦女能節者無不孝。能孝者無不賢。故國家旌表節婦。必兼孝行而後可。兩漢帝王謚號。文曰孝文。武曰孝武。終漢之世皆然。明以來。皇后謚法亦皆以孝字冠之。誠以百行之原。王者之大經也。何況民人。第同為孝婦。而難易差等不同。綜所見聞。及往籍所載。未有烈於吾邑毛馮氏者。毛名繼宗。每歲運糧北上。母老病肝痛。子幼尚在襁褓。甘旨湯藥。皆馮任之。他日母病篤。馮焚香籲天。求以己肝愈姑病。乃取刀刺脇。肝尖躍出。急割之。置之盤中。夜半兒曉。馮慮驚姑醒。以帕裹創。血淋漓。入撫其兒。兒卧復出。慮肝少不足愈病。拜告已。復淘肝出。左握肝。右持刀。力割一葉。而馮亦昏暈仆矣。久之掙起。浣而煎之。以奉姑。姑問何物。曰藥肆宰鹿。吾買其肝。食畢。病良已。明日馮卧方起。鄰里叩門。問馮刀創者。戚黨饋藥者。官吏遣醫走視者。慰勞嘆獎者。一時畢集。爛其盈門。初不識何由聞知也。蓋鄰人方卧。見毛氏庭中。紅光射天。以為火也。出視無之。第聞空中神語。毛馮氏剖肝食姑。關帝文昌。遣將救護。彷彿金甲光照耀庭間。登牆窺之。備見馮刺肝狀。神魂俱飛。咋舌戰栗。由是入市傳布。闔城皆知。獨其

姑以為鹿肝愈病神奇耳。天河生曰：割臂刳股，皆出於本人至性。雖王者不以責人。况於肝哉。父母天性之親，猶或難之。况於姑哉。雖謂馮氏為古今孝婦第一人可也。此往事。江君天乙有奇孝驚天傳，予未之見。就所聞記其大要，為郡邑光焉。

伯兄殉難

伯兄月清，少穎悟，文辭豐贍。中年就揚州太守幕，遣長子從予渡江，而妾及次子侍焉。八年九月，粵賊三犯揚城，兄為太守畫防禦策甚備，而居民半已驚竄。僕楊裕請間為言，民情不可恃，將密檢行裝以待。兄曰：毋爾。朋友交以信義，人在危急中，何可棄去。汝但往視吾兒，吾兒幼，今以付汝。閱日，太守乘間遁，雖幕友不令知。兄乃歎息出，與同幕丁君嘉珊遇賊東門外。嘉珊大言誑賊，賊信之。趣兄同謁其酋長。時兄方據地坐，聞賊言，憤甚，突起躍入護城河。賊沿岸以戟鉤之，血殷水而歿。嗟夫！幼齡孤露，兄弟相依，困頓中途，遽遭凶折，生無庭室之歡，死絕邱墟之慕。人生到此，天道寧論哉。妾鄧氏先一時投水死，楊裕卒奉兄子自賊中逃出，以歸云。兄著有自怡亭詩詞一卷，題名錄絕句云：題名自古副名難，洗眼何須徹底看。一樣黃梁誰得失，請君先我過邯鄲。送金竹農歸草堂云：古木作奇吼，狂雲無滯陰。詩情接奔馬，天意鬱歸心。小雨酒初罷，垂楊蟬自吟。臨風漫惆悵，容我暫披襟。題項鐵生何曾睡著圖

云。萬事低眉過。爭如對酒吟。吾生有浩氣。俯首亦千尋。好夢嫌多事。黃梁知此心。解人容易索。只恐夜深沈。秋闈報罷。寄江寧王蔗鄉云。孤城落日氣荒寒。斫地悲歌獨倚欄。天馬何能耐羈勒。海鷗從此狎波瀾。夢魂莫受青楓阻。肝膽常如白日看。君是乘風終萬里。未須露袖對秋殘。我見三首示弟云。我見太虛雲。隨我思親淚。雲出猶能返故山。冥漠知何地。在昔幼小時。不識劬勞意。白雲蕭蕭悲復悲。酒漿莫奠心魂飛。宵來夢見慈親面。追欲從之已不見。月色沈沈兮燈昏昏。重泉無路兮天無閫。我見投林鳥。觸我愛弟之深情。愛弟弟能知。所以好鳥相和鳴。豈無高山與喬木。同羣定在枝頭宿。亦有金吾挾彈來。啾啾不忍兩分開。兩分開弟莫哀。我見東流水。感我知音者。水是東流終不西。人是真心不能假。千里聲相聞。同心各戀羣。北風吹寒律。西林沈夕曛。白馬朱旗耀顏色。污穢雙眸看不得。滿地江湖波浪深。人心誰復測。嘗與王君南卿集飲酒樓。壁懸輿圖數幅。樓下葡萄一架。綠滿階庭。二物絕不相類。南卿曰。賦此可乎。即應之云。滿庭秋色太橫斜。忽見葡萄憶漢家。酒後更無壺可擊。披圖閒看古流沙。其捷給皆類此。

温明府

六合温明府

紹原

字伯平

湖北江夏人

少負異才

性孝友

咸豐元年

權知六合縣事

下車脩

六

城垣屯義穀期年集事。二年冬，粵賊初犯武昌。公曰：六合雖小邑，然濱江屏蔽淮泗，賊乘風而下，日可千里。此要地不可玩也。於是招募壯勇，製器械以備不虞。三年春，賊據江甯，陷揚州。果以千人犯六合。又分隊竄擾鳳泗間。邑城四面受敵，公率眾與戰。賊少卻，繼以大隊夜至。或議閉城拒守。公曰：不出戰不能守城，預戒兵勇，不及賊毋發火器。夜行宜靜，毋譁。遂出縱馬前行。眾請所之。公曰：惟予馬足是從。賊初由長江鼓行東下，屢陷名城。大帥遇之輒潰走。勢破方張，既至見城小，內外寂然，心易之。公忽由間道繞出賊後，銃礮競發，以暗擊明。賊眾驚潰。我兵奮前追殺，無不鼓舞爭先。一以當十。賊自行衝擊，死者無算。四年，賊冒難民謀入城為內應。公偵知，稽核市廛。凡城內士民皆給符驗而外出。外至者問所投舍，守城兵引往質對，以故奸宄無所容。賊掘地道，公自內掘出，先發擊之。城圯，隨時堵塞。先後十數戰，賊屢挫衄，積功擢江甯府。加道銜。縣事委於李君守誠。公獨任防剿。時紳士信公既深，倚公為柱石。居民客商及遠近避難入城者，皆助守。不願遷徙。誓與城為存亡。六年，江北大帥德興阿公以蜚語入奏，褫公職。賊眾醜酒相賀。七年，何制軍疏復原官，加運使銜。事如故。一不以升黜為念。八年八月，賊由廬州大舉東竄。城中兵祇二千餘，請於制軍。益兵數千。而德帥調赴浦口。甫至而大營潰。賊裹脅兵勇，直趨六合南關。公與宣化鎮軍羅玉斌等盡出擊。殺夜

入巡城婦孺皆運磚石以助。歷二十餘日。都司王家幹力竭陣亡。糧盡援絕。公集紳士張位中等語曰。諸公為紹原力已至矣。我死無憾。何以對闔境生靈。語未畢。邏者報東城已破。公趨東城。而賊從西北隅入。格鬪良久。身受數創。既仆。猶奮臂握拳。唾罵不絕。至胸腹破。折項頸。斷裂而歿。夫人王氏投水死。子輔才同時遇害。城中百姓以萬計。僅見宣化軍踰城東逸。餘者殲焉。先是父母就養署中。公使弟奉母出。而留王與輔才不遣。曰。不令吾民婦子獨死也。

又

予聞桂伯陳先生云。賊之初犯六合也。偽軍帥孫寅三等率眾八千攻城。公令士卒飽食出戰。而預遷城南民於城內。空其室。廣積薪草。灌油其中。竈底皆布火藥。既戰。歷數時。佯敗入城。賊追至城南。餒甚。各就民舍炊飯。竈突火起。遠近同發。公急開城。截其去路。四面伏兵。兜剿賊。餓疲不能拒敵。殺死溺斃者過半。自武昌以下。未有如此受創者。

李杰

雲南銅運委員李杰者。黔人。能詩善畫。以征苗功。累擢至參將。非其所好。改就知州。王君南卿與相識。談次。問曰。君貌恂恂。不類武士。何以參戎。李笑曰。此非吾功。吾妹之惠也。異而詰

之李因言父官提督屢著戰勲母氏偕歷戎行亦具大力繼杰而生一妹幼負異稟王立長身力大尤罕其匹出入好作男裝姻黨間悉以公子呼之年十四從父殺賊衆莫能敵馳馬試劍居然美少年見者莫辨雌雄也又十年父母欲為擇配使還女服抑鬱不樂而卒相傳妹初生時覩近金剛寺災有火毬出自大殿飛入署中紅光燭天遠近救火者皆至既入署寂無所見第聞夫人分娩適舉一女衆異之以為金剛部將轉生也其生平戰功皆讓阿兄故杰得備位行間云李既由長江東下迂道游吳門女妓姚脩竹者美姿容善度曲而性極恬靜紈袴子弟過訪者交口稱贊纏頭甚豐脩竹落落然無所許可獨見李雅相屬意李亦極愛賞之議以千金納為妾而先留佩玉一雙為聘訂期二年中改官江南取焉自是脩竹獨居樓上不見客客有迫之見者尋常問答數語外翩然而返已而踰期李不至候之數年抑鬱成疾日弄李所贈佩以寄思慕又數月病益劇乃執其母手訣曰兒與李君誠前緣然初意非特念李寔聞李妹為天下奇女子故慕之而及其兄耳今病篤勢不可活願母以雙珮殉兒寄棺尼寺中勿釘勿葬倘李君幸而來猶得憑棺一慟使知天下有奇人亦有癡兒也語畢涕泣而逝

借闈

已未江南鄉試。奏借浙闈學使孫公錄遺於江陰。而有人浮於號之患。商諸何制軍。預張文告。大意謂錄取之數。絀於號舍。勢難從寬。科名早遲。各有時命。取者赴試。不取者回里讀書。以待下科。考生見之大譁。乃於第一場常屬錄遺之期。集眾轅門。求學憲奏請上下江分為兩棚。孫公五鼓升座。甫發一礮。其兩礮已奪去。吹鼓手甫一發聲。則樂器金鼓。棄擲轅門外。江陰何明府及諸廣文。勸導再三。非即時拜發。奏摺不可。公怒曰。誰為首事者。論之。於是丞差皂隸。喧呼捉人。眾乃一闕而散。時日已近午。急招常州生入場。訪知首事為揚屬兩生。禡其衣頂。其後上江人到者。大減。號舍竟綽乎有餘。語云。人無遠慮。必有近憂。兩公之憂。轉因遠慮而得之。事固不可預知哉。

適園

江陰陳氏適園。局勢不寬。而池臺廊榭。略具四壁。懸墨摺鐘鼎之屬。內外花木楚楚。其南有小樓。雲影山光。近在窗几。春晨秋夕。足以娛情矣。園主人能詩善畫。遊客贈畫者。酬之以詩。贈詩則答畫。頗具邱壑。城北君山。擅一邑之勝。而背山起樓。置大江風景於嶺後。此適園主人所笑也。

談夢

人生如夢。夢更何憑。然有不可解而不能盡斥為妄者。昔有朱孝廉。夢見會元與己同姓。而名字祇露金旁。因改名朱鎔以應之。及榜發。乃朱錦也。又有周斯盛者。夢見解元與己同名。而朱印蓋姓上。模糊不辨。及榜發。乃晏斯盛也。近日馬君元瑞。會試掄元。而皖人蔣元瑞。夢與周同。余君鑑領解。而吳人余錫成。夢與朱同。以為因則無因而來。以為想則非想所及。前後一轍。而小有參差。此癡人說夢者所不解也。

視鬼

江甯宰筠筮揚州阮曼亭。同日招飲西湖。泊舟以待。予先赴曼亭飲。而後就筠筮。清談既深。遂宿湖上。兩僕一金一李。李年少好弄。金差長。目睛深碧。俗謂碧睛能視鬼。信然。是夜李僕如廁。見一老翁荷杖提壺而過。一壯者馳而逐之。老翁回顧大駭曰。鬼鬼縱步疾奔。絆於樹根而蹶。壯者追及。好語慰之。欲扶之起。翁遽揮杖反擊。壯者又駭呼曰。鬼鬼乃亦奮拳擊老翁。方爭鬪間。有莪冠博袖。狀類士人者。從容而前。問何鬪。則皆曰。鬼鬼。士人笑曰。風清月白。大好湖山。那得有鬼至。探懷出榼曰。吾有肴核。老翁杖頭瓶宜有良醞。今為兩君解紛。且共小飲。何如。壯者曰。吾醉未解。不能勉陪。老翁亦不願。士引手按之。啟榼傾壺。飲啜大樂。酒半。自下其頭。置之膝上。唾津於掌而拭之。又整其冠而戴之。二人大驚絕叫曰。是乃真鬼。士人

怒曰。鬼何在。公等以我為異乎。當請吾師來。吾師時茅乃異耳。言已。疾往。二人欲乘間逸去。而支體如縛。不可移動。李毛髮灑淅。欲竟其變。姑候之。少頃。士人果領一物至。則九首環集。肩上。面色不辨。第聞語音雜出。有笑聲。有哭聲。有老年龍鍾聲。有少壯歡愉聲。有諂媚聲。有驕傲聲。一時並作。行步蹒跚。士指以語。二人曰。視此何如。二人並驚仆。李僕亦大懼。欲還。而足觸地上。有物視之。亦人足也。穿地而出。頃之及股。又頃之及肩。奮而躍起。轉身而立。則頭大如斗。耳目口鼻都不見。渾渾如一毬。李狂奔還船。招金持炬同往。至則大頭者復入於地。九面者化為巨鳥飛鳴而去。而士人左右紛來攘往。奇形怪狀者尚多。見火至。倏忽四竄。惟壯者老翁仆地如故。金急握士人臂牽之而走。士怒。自提其頭以擊金。又張目吐舌。披髮尺許。金曰。伎止此乎。我不懼。士又化為女子。宛轉哀求。金釋之。則一玉面狐也。頃之。狐又化為鵝。毛羽離襪。不能遠飛矣。乃繫之船舫。復與李同燭。二人時老翁初醒。塵污滿面。蓋絆蹶時首觸於泥故。壯者面半赤半黑。則書飲友家友以朱墨塗之。而彼不知也。二人以是互疑為鬼。而鬼遂叢集於無窮。明日。攜鵝入市。賣之。得錢五百。天河生曰。自齊諧志怪以來。若聊齋消夏錄。所載狐鬼多矣。然未有離奇變幻若斯之甚者也。九面鬼。非九頭鳥。即九尾狐。惜乎匆匆化去。不然。攜以入世。隨時易面。左宜右有。此千金之寶也。豈第五百而已乎。其號為時

茅也宜矣。老翁壯者僅僅二人。又塗飾面目。無以自別於羣鬼之中。藉非金僅碧睛。世烏得而辨之哉。

候仙

吳有士人。棄家修道。千里求師。鍊汞烹鉛。歲費金錢無數。一日有道人。一老一少。衣冠瀟灑。行吟市中。吳士急往迎歸。居之淨室中。叩求至道。道人曰。仙有三等。有天仙。有地仙。有人仙。君將何求。吳士曰。人仙何如。曰。攝神御氣。救護命寶。可以卻老還童。若夫天人合發。采藥歸壺。虎嘯龍吟。縮地千里。地仙也。金蟆躍月。鍊性昆盧。世界空虛。出神入化。則天仙成矣。吳士曰。若某者可望天仙乎。曰。達靡面壁。鍊離還丹。天下豈有不能之事。第降格相從。吾二人差可為力。若取法乎上。非吾師不為功。吳士曰。君師何在。曰。天台之山。仙靈窟宅。君子所知也。猶溪以北。九折峰以南。有石梁焉。濶不盈尺。而長及數十丈。上有莓苔之險。下有絕冥之澗。欲濟者。梯岩壁。捫蘿葛。度得平地。則瓊樓玉閣。碧林醴泉。無境不備。真乃別有天地。非復人間。古人惟帛道猷居之。抱璞子葛洪過之。而吾師在焉。吳士曰。某可往乎。需費幾何。曰。道成之後。朗吟飛渡。不費一錢。不成。即多錢亦不達。第山下居人。率貧苦。宜散貲以結善緣。千金不厭多。數百金亦不謂少也。吾二人去。一留一。先達誠意。則君可往矣。吳士欣然。授以五

百金遣之。而留其少者為質。約期十日返。其第九日少者長睡。及午。門不啓。呼之不應。穴窗窺之。則人與器物及陳設羹鼎之屬。搜刮一空。候至踰月。黃鶴不還矣。吳士懊喪欲絕。而求仙之心終不死。他日夢其先人語之曰。翌午入市。有青袍黃冠。袖劍背胡盧。自西而東者。真仙人也。候之。果見其人。而形狀醜。涕唾沾襟。招之告以意。青袍者曰。貧道何知。君欲卻病延年。則卽嗜欲寡。思慮淡。飲食夫人而能之。若白日尸解。拔宅飛昇。不易言也。士強留之。朝暮供膳甚豐。其人累日不食。一食輒盡數器。猶不足。夜不卧。端坐達旦。而無一語及修仙事。居久之。大失所望。已而道者病心痛。晝夜呻吟。問所苦。搖首不言。進藥不服。醫皆不識。為何疾。日益危篤。遺矢滿堂。士心厭之。且慮其死而無歸也。欲遣之破廟中。忽有婦人踉蹌造門。尋其夫。士問汝夫為誰。曰黃冠青袍者是也。衆皆大譁曰。仙人有妻。宜其病且死耳。士曰。汝來甚善。久欲歸之矣。急為呼與。趣其昇去。而心愛其劍。私留之。其人從榻上欠伸而起曰。死不死尚不可知。第他物可以奉贈。一劍一胡盧是吾役也。不能付汝。婦方哭泣不已。其人撫掌大笑曰。世事誠可哭哉。雖然。哭亦何益。遽擲胡盧庭中。化為白鶴。婦人跨之。擲劍化龍。自騎之。凌空而去。天河生曰。無仙恨不得仙。仙至又不識仙。真者不易識。易識者不必真。噫嘻。豈獨仙哉。

鴈足

吾邑邊頤公壽民以善畫蘆雁得名疏脫生動初學時苦無師承築室城東蘆葦間穴窗窺之食宿飛鳴各盡其態故落墨幾於化境頤公甥薛懷字小鳳筆法酷似其舅得意時直欲亂真即作者不能自辨乃約於鴈足別其色邊作黃色而小鳳微紅至今郡人過其地猶指為葦間老屋址也

杭州初陷

咸豐十年二月金陵賊初陷杭州先是張總統國樞威名遠著賊畏而忌之議由廣德進犯杭州分我兵力浙撫盡以軍事委諸運使某公某所募勇多與賊習或於城上相問訊卜士王道平者賊謀也獲而詰之則賊眾冒入隸名鄉勇者數百人當時慮激變不敢窮治僅斬道平以徇賊舉西湖殯棺積城下累級而登無以一天加遺者甫入六七人鄉勇遽怕首呼譟滿城鼎沸遂陷將軍瑞昌公聞變欲自裁左右曰公死吾輩無噍類矣不如固守駐防城以待外援若援絕力盡死未晚也會總統飛檄張提軍玉良救杭道過蘇州蘇藩王雪軒方伯曰江浙猶唇齒也杭州不復蘇州必危君能於旬日內克復杭城必以十萬犒軍軍士聞之奮迅疾馳勇氣百倍瑞公拒守三晝夜而提軍至約期並舉令先鋒偽為賊裝入城展旗

大呼賊見張家軍驚為總統炊飯未熟而奔。瑞公縱兵合擊之。獲賊輜重無算。方伯得報大喜。犒之如其言。當時有七賊破城三十人。復城之謠。蓋杭人怨之極。言其易耳。

淮警

州牧某君知河帥之好酒嗜歌也。以千金召梨園於蘇州而獻之。河帥試之名部也。大喜。延漕督權使。迭為賓主。宴飲累日。而捻寇自徐宿循河而東。警報疊至。命都司德君率兵三百禦之。與賊夾運河而營。同知鍾姓者言於帥曰。夾河相持。非久計。宜趣進戰。檄下。都司曰。賊衆我寡。渡河則人數歷落可見。某非惜死者。第恐一敗大勢不支耳。必欲戰。請益兵以決之。不聽。我兵半濟。賊衆奮前。槍殺敗潰立盡。縱騎追逐。直及王營。而浦中歌舞未已也。及河北百姓號泣南奔。衆乃大驚。漕督權使疾還署。河帥僅以身免。日暮亦至郡城。呼於慶城之門者。不納。慮其冒也。而後入之。未幾。權使繼至。呼於北門。門者曰。城無商。不須權也。遂去。賊既焚掠清江南至湖甯。而漕督欲行。行李輜重自署前。至於南門。山邑宰顧公思堯語諸紳士曰。君等第閉城堅勿放行。彼若不釋於諸君。有我在。保無虞也。衆曰。諾。使者再三至。脅令啟城。衆不可。舉銃擬之。衆即當銃立。曰。身可殺。城不可開也。去之。至東門。東門亦然。怒而召邑宰。問諸紳。堅不開城。何故。顧曰。渠輩皆書生。身家性命所係。慮開城則人心必離。人心

離則奸宄伺隙而起。外寇乘之。必不免矣。且言曰。即為公計。不如安之。今盜賊密邇。而百姓
攝伏不動者。恃有賊耳。一出城。則盜賊賊也。秀民貧民皆賊也。公將焉往。明日賊退。城外居
者被劫。行者被掠。漕督思顧言。甚德准人。

吳觀察

清江之亂。吳鴻生觀察方乘籃輿行道中。賊至。輿夫置之而奔。吳默坐輿中。出而戍之一賊
即乘其輿。餘賊昇之。鳴金呵道而去。觀察典郡江甯時。與侯青浦廣文。湯雨生都督。王二樵
布衣。高已生。孝廉。為五老消寒會。賭酒賦詩。典會不淺。蓋折衝壇坫。固非能禦侮疆場者。五
人之中。四以身殉。傷已都督。嘗為此會補圖。並識一絕云。五人三百五十歲。高會黃堂聚散
星。後五百年。誰復識。六朝山色自常青。

大營兵潰

王雪軒方伯之擢任浙撫也。藩庫寔存銀一百餘萬兩。代公者愛惜小費。探船偵騎皆汰減。
時金陵大營積欠軍饌甚鉅。和帥慮補給無期。議每歲祇發八月。遇閏減半。軍士大譁。閏三
月已酉。賊集諸路死黨圍攻和營。前後同時火起。遺金及礮位兵械率齧寇。總統張公拒戰
十晝夜。力不支。遂退丹陽。飛書調餉六十萬。冀以收拾人心。再圖進取。司財者祇發六萬。眾

志益攜賊偽為官軍裝束。數道並進。公冒雨出城護築營壘。馬傷脇。而前敵提督王浚總兵熊天喜力竭陣亡。公率小隊百餘人禦擊良久。及橋。百姓爭涉者擁塞橋口。公勒馬衛之。俟其去。躍入河死。和帥去之。常州無人。又去之。許豐關乃卒。

馬總鎮


徐中丞守蘇。初有清野之議。不果行。四月丁卯。有馬鎮軍至。不知所從來。趣燒城外民房。中丞不可。馬曰。野不清。城不可守。乃予二萬金為清野費。適城外火起。益令軍士縱火焚之。而鎮軍不知所往。時天雨氣寒。百姓謂賊已至。從水火中踉蹌而奔。兵搜於途。勇括於室。婦孺投河及踐踏死者無算。越兩晝夜火熄。而真馬鎮軍乃至。守城兵以為偽也。殺之。

張提軍

張提軍王良初奉總督檄留守常州。總督行常州陷。提軍以四月丙子抵蘇。請饒於中丞。中丞亟迎見之。使之駐兵城外。軍士鼓譟曰。我豈賊耶。首白帕奪門而入。比撫慰出城。而提軍已解維南行。是夜防守如故。閭巷晏然。及丁丑黎明。馬足聲四起。紅巾長髮者大呼殺人。而省垣陷矣。

下明府

賊初至蘇以省垣四面受敵不欲據守日驅丁壯運物葑橋為去計時制軍方伯不知所在大營清官寂無影響後十日丙戌賊分衆南下與皖南鎮江長貴戰於吳江之勝墩長貴兵敗入湖港遂陷嘉興由是兩旬之間破州縣二十八九月癸卯由青浦進犯松江知婁縣事卞乃詭欲出戰華亭趙某欲守城卞曰不戰胡以守時提標各營先期登舟弁兵存者寥寥卞獨率勇迎擊戰少卻已而後隊蜂擁火器不給乃詭敗回欲閉城拒守賊追之急中銃於馬上猶據鞍馳數里入署而卒乃詭之外聞有秀水令彭君溧陽令尚君是三十州縣中同時殉難者尚名拉布彭忘其名



金壺遯墨卷四

鉢池黃鈞宰天河著

何制軍

何制軍初履江督任。王雪軒方伯寔左右之。虛心下士。延攬英豪。凡為物望所歸。不惜口齒獎借。如致清河吳公書云。側聞政績。每思相遇。何疎徧開時英。益歎此才不易致。六合溫公書云。有不戰戰必勝。居然儒將風流。不言功功最高。信是中流砥柱。此外若張殿臣。總統馮提軍。子才。或誼結師生。或禮分賓主。誠哉人才之總滙。幕府之宏規也。及方伯升任浙江。頓失常度。常州之亂。莫知所之。沿途滅騎。從去旗幟。無有識為宮保船者。而奏報掩飾各情。謂蘇府奉撫臣文商借夷兵。先期赴滬。藩司三縣均受重傷。其是否。朝廷不知也。又謂撫臣設立機密房。任用戚友小人。署外不得與聞軍事。其是否。死者不知也。自謂巡視江口。安輯夷務。調赴江靖。如臯防守。有某省某提督。分守瓜儀。諫壁有某鎮某總兵。累累言之。失中而固外。其是否。天下後世不知也。善哉言也。

王貳尹

王貳尹者。需次蘇州。奉檄巡城。丙子夜至閭門。一官踞胡牀。侍者數人。謂曰。此何時尚巡夜。

耶。王異其言不暇詢問。過胥門亦坐數人曰。若何自苦可速歸矣。王益疑之。急詣撫署。衆皆卧。語其闖者而出。則衢市已有呼譟聲。人馬雜沓。聲王避走小巷。遇賊於館門。問何為。說詞答之。且請指示生路。賊予以黃旗。令出封門曰。某司馬遣探軍情也。及門。門者果問。如言應之而行。由是觀之。蘇城之失。寔內訌。非外人也。六門分守。布置釐然。豈一朝夕之故哉。先是守城兵役稽察。惟嚴行旅無金。艱於出入。有賁者不問人也。寔求虛應。操縱行奸。遂使繁富之區。夫諸寤寐惜乎。

婁判

又婁某者。官通判。巡夜歸寓。覺驛在足。賊至倉皇無以對。一賊脫其足下。笑曰。幸遇我耳。若他人戮矣。我亦流品官。候缺湖南者。又聞賊酋納賁為令丞等官。出入蘇常。藉為耳目。章服輿馬多金。而豪儼然。與縉紳為伍。衣冠鬼域。誰則知之哉。

姜少汀

杭人姜少汀者。販賣古董於蘇州。賊付偽劄數十道。使出招募工匠。寔至上海約內。應也。滬人獲而鞠之。姜謂偽忠王李秀成帥賊四十駐彭氏宅。新降兵勇不下二萬。則大營領兵官李文炳統之。別有三四品官五六人。皆降賊領事。如故。十日內冠帶出入。炫耀其徒。衆過此。

則從賊裝矣

烈女

松江初陷。賊閉婦女十數空室中。脅而淫之。一婦不從。賊褫其衣。將以利刃刺乳中。婦乞哀。乃已。次至某氏女。奮前奪賊刀。罵曰。任賊何刑。我不懼。賊怒。擢女髮懸諸屋梁。鬻割肢體。女揮肘奮足。傷賊左目。血濺數尺外。卒刺其喉。始絕。蓋當賊未至之先。預存僥倖心。而自願辱身玷行者。天下無是。人生死之間。一念之動。遂異霄壤。噫。豈獨女子然哉。

分米

初。滬上大憲遣英吉利呂宋兵助我兵。勇收復松江。賊遺米萬餘石。夷取其千。故華亭邑令帥勇急入比戶。按驗適新令營弁復至。顧米而爭。觀察吳公命予官弁千石。有差。餘以寔倉廩。嚴堯鑰謹出入焉。先是賊驅百姓中壯者出戰。老幼廢疾者日給升米養之。至是米歸於官。窮民轉不能望撮勺。踰月攻青浦。我兵失利。賊衆衝出。復陷松江。焚米燬城而去。遠近農民各擢小舟入城。裝運梁柱窗几之屬。墮牆掘地。搜括一空。巨室重門洞見前後。而得米之官弁。又莫知所之矣。或曰。賊以豺狼蛇蝎之資。魚肉百姓。惡矣。然亦觸矢石。冒水火。瀕險而得之。官吏毛髮無所與。各分米千百石。拱手而享其成。不言而喜可知也。

李國泰

外國和約十年一更。英吉利以兵赴議於天津。上命僧王率師禦之。已而飭回江寧候旨。遣桂良、花沙訥二公會同江督。至上海集議。凡五十餘款。皆由漢奸李國泰為之主謀。以華夏之人倚戎狄之勢。挾制凌傲。全無天良。是與梟獍之徒。反噬父母者何異。當事羈縻容納。聞者痛之時。英夷捉人於上海。鄉民賣布糶米。獨行夷場者。輒被掠去。積數月。竟失數百人。又多遺失小兒。百姓切齒。會邑廟演劇。夷衆往觀。國泰方據高坐。華冠麗服。作夷語。指使左右。意氣揚揚。百姓持挺哭前。痛肆毆擊。腹破腸出。氣息奄奄。衆奔集天主堂。墮其牆垣。毀其器物。揚言不得人終不休也。夷訴於官。官曰。捉人者吾不能止。今百姓積怨。吾亦不能禁。不得已。使出所捉。召鄉民自往領之。則皆漆身瘡啞。莫辨誰何。鄉民見之大哭。被捉者亦哭。以筆墨代喉舌。仁認還十數人耳。夷衆昇國泰歸。納腸敷藥。竟愈。

松滬雜作

咸豐十一年春。嘉興賊竄擾平乍。距青村不及百里。元道州詩云。城小賊不屠。民貧傷可憐。逼近賊氛無。兵無械而優游經歲。與賊相忘。恃有此耳。袁廉叔張孝威諸君。賭酒論詩。依舊昇平風景。予有松滬雜作云。滿天烽火照蘇州。獨有花枝不解愁。麗水臺高三十尺。隔窗清

坐看梳頭吳淞樓檣達西洋。廿載華夷共一堂。憑杖荷錢遮蓋好。橫塘無數野鴛鴦。連宵歌舞倒金樽。曉起飛輿競出門。士氣凌夷官氣減。銅山當道市兒尊。錦衣公子性奢淫。一點金閨禮佛心。香火共傳紅廟盛。靚妝華服拜觀音。滄城竹枝十之四月冷風淒野哭高。三吳黎獻望弓刀。當時鷹隼凌秋峻。化作山雞愛羽毛。艱難吾亦愛餘生。西北浮雲尚戰爭。白髮多情老太守。扁舟詩酒弔荒城。蕭條閭巷不知門。零落殘兵倚樹根。忽見桃花墮清淚。去年杯酒正銷魂。所猩色衣衫淺綠裳。遙驚軍士婦人妝。前營收得降司馬。十六年華白面郎。春老營門柳絮飛。旌旗翻日錦成圍。黃昏厭聽伊涼曲。醉挾雛鬟馬上歸。華中曲八之二匹素生風氣不羣。高齋春散酒初釀。近山泉水猶波浪。欲與仙人掃白雲。題莊氏畫卷又中秋得郡齋友人書。偶成二絕答之。兼寄淮上親友云。火毬花礮對城飛。昨夜黃巾又合圍。餬口艱難理骨易。夢魂安穩不思歸。名山鐘鼎兩無緣。學劍無成更學仙。妻解談詩婢釀酒。一椽歌哭度中年。

蓬窗話雨

袁廉叔同年。自都門遊幕湖北。未及半載而武昌三陷。變姓名為卜士。徒步東歸。與笑山蓮汀相見。蕭塘舟次。清樽細雨。備道艱危。匪第離合之悲。兼有難言之感。辛酉秋日。追為蓬窗話雨圖。而屬鈞宰賦詩紀之云。袁君磊落天下豪。誰其善者徐與曹。麟角鳳喙毓洲島。精氣

融結如粘膠。文章光芒動。尊俎詩酒浩。瀚凌風駭滄江。混混老蛟伏。九峰嶽嶽金星高。壯年展足謝鄉里。披策長安謁天子。乘雲不到天門高。隨風直渡武昌水。武昌城外多風塵。武昌城內半荆杞。春來方喜集遺黎。夜半淒聞哭新鬼。新鬼啾啾故鬼驚。幕中書劍更飄零。中丞力守原期死。部將恩深轉累名。扶病縋城憐士卒。直言甘罪負君親。秋風痛灑西州淚。愛日孤懸南國心。歸途惻惻歷兵燹。張祿先生足徒跣。十萬軍聲鶴唳驚。三千里路蠶叢險。故里生還世共悲。故交相見情重展。座上何人不涕洟。船中有酒須沈湎。今日何日淒以風。海雲慘淡天溟濛。長鯨獨吸助談辯。履虎不啞灰心胸。我亦宣南舊相識。十年契濶如飄蓬。人生各有知音感。付與蓬窗暮雨中。

感興

近年戎馬倥傯廢棄筆墨。不欲以腐儒酸態貽後傑笑也。惟語涉軍事者錄存一二以識一時蹤跡。感興云。離亂難為客。艱危獨有身。故鄉雲淡客。長夜酒清醇。事業慚明鏡。昇平羨古人。劇憐花訊晚。寒雨不成春。重望膺高職。鴻文仰宿儒。祇宜盟玉帛。未解掣援鋤。絳竹圍城樂。旌麾小隊趨。幸承寬大惠。斧鉞不勝誅。甲第連雲起。淒涼一炬中。海波飛雨黑。城火照天紅。蘋尾池魚泣。焦頭社鼠空。百年繁盛地。榛莽卧秋風。突厥情無厭。單于志可疑。乞師原失

計。通市欲居奇。海國橫珠貝。江城集羽儀。未遑憂後患。聊爾救猖披。大將量沙急。司農仰屋
歔。拜官資楮幣。窮法算軛車。束手求芻計。傷心竭澤漁。似聞籌國帑。秦晉日飛書。鬱勃書龍
氣。離披燕雀居。萬言蒙主聽。千里駐援車。強寇戈揮日。窮檐錫荷雲。江南好邱壑。無奈入殘
曠。又答周次軒云。窮儒抱詩書。震海正軍旅。持冰語夏蟲。得不笑迂腐。朝登橫雲山。暮宿春
申浦。荒原斷鳥迹。孤吟答秋雨。手持經世文。寂寞忍終古。理才干支泉。光氣燭天宇。薄叢鮮
逸翮。淺瀨無巨魚。哀草塞庭戶。高盼凌天衢。昂昂彼何人。僕僕來通都。匍匐侍朝貴。睥睨驚
鄉愚。和容凍雲活。冷語春條枯。痛哭入塵壤。大笑游清虛。浙東姚子明云。此輩那值一哭。只
合嬉笑視之耳。

詞

錢塘張孝威茂才。左錢以蠅甲廬詞稿屬題為成齊天樂一闋云。新聲半是離人感。依依此
情誰語。畫檠搖燭。金尊照影。織得柔絲千縷。瑤情如許。和寶月清輝。散飛天宇。迢遞湖山有
人銀漢共淒楚。當年幾聽砧杵。被蘭言綺思。勾起愁緒。別意雲牽。春華水逝。曠了疏林倦
羽。清歌漫與待理楫。西湖調箏細譜。長日簾櫳。夢涼花外雨。蘇常之警。有浣溪紗送春句云。
山塘七里春如錦。殘鳥嘯花眠。輕帆微雨。別金尊。却恨浮雲生長本無根。如今消息江干樹。

望斷長安路。樓臺歌舞。是誰家門外。春風飛絮滿天涯。答揚州符南樵孝廉

葆森

臺城路云

日長同說新秋好。秋來又增悲緒。脈脈情波。盈盈別淚。化作一天涼雨。從頭記取。問底事匆匆。頻年羈旅。籬豆花開。寒蟲依舊伴淒語。文章今日休矣。便酒酣抑塞。拔劍休舞。海國鯨

鏗。山城虎嘯。那是江南淨土。關河道阻。賸慘月酸風。荒寒無主。多少閒愁。併成離恨。苦題會稽包子。梁棟美人。屏幅金縷。曲云。士女傳清照。古人中。張萱周昉。並稱名妙。數十年來。京兆筆。誰畫朝雲最好。有越國詞人。包老。燕瘦環肥。遊戲耳。儘秋波一點神光。到金粉俗。筆尖掃。如今霜壓蘇臺草。憶匆匆。飄零書劍。移家洲島。幾幅生綃。人似玉。閒倚屏風。秋曉似甚處。相逢一笑。祇恐琴心。挑未得。况茂陵司馬。非年少。醇酒願此生。了。孝威詩詞。秀逸絕倫。南樵則有蒼莽磊落之氣。他日當選刻同聲錄中。

夷館

嘉興王君壽園。約住夷館。見卷髮環鬢。碧睛高準者數輩。能作上海語。脫帽握手為禮。服御陳設之屬。皆與中國殊製。乾嘉間五色玻璃初出。有力者飾為美觀。故簡齋隨園落成。諸名流形諸歌詠。誠重之也。近則酒樓茶室。觸目皆是。美館中明鏡四列。大小凹凸不一。徘徊其間。化身十百。左右顧盼。不啻一樹一放翁。一花一世界也。

玻璃

玻璃一作頗黎一名流離十洲記上方山有玻璃宮崑崙山有紅碧頗黎天竺記大雪山中諸七寶生取易得惟頗黎寶生高峰上難取漢書西域屬國多奇寶中有流離注引魏略大秦國出赤白黑黃青綠縹紺紅紫十種流離蓋自然之物踰於眾玉其色不恆今俗銷冶石汁和眾藥灌而為之虛脆非真矣上海當賊陷江浙時八郡難民陸續廣集有力者自賃大屋窮民則官置草舍以庇之時號洋涇浜為流離世界以此魏書大月氏國人商販京師能鑄石為五色玻璃乃美於西方來者或即今日英夷所自助與

蟹子疊

浙江甯紹既陷賊以重兵圍杭州期於必得時餉道斷絕城內斗米千錢窮民至煮箱皮食之朝廷責蘇撫坐擁重兵不急進剿致賊全力攻浙乃急籌餉金二十萬兩米穀數萬石以輪船運往浙江將及蟹子疊遇淺船膠盡棄所有於溟渤之中此夷船向未曾有之事天為之也杭城困守月餘餓死者日以千計王中丞朝服自縊遺令開城縱放百姓賊遂掩入時辛酉十一月也偽忠王李秀成棺斂中丞以下殉節諸員餘官願從者留不願從者給發資斧即令護送遺櫬而還以為生與為敵死不與為讎也

大雪

是歲除夕前三日。夜寢者睡足而醒。天久不明。輒轉移時。視窗上若有曙光。試起開門。則上下阻塞。撲面如冰。第聞鄰人喧呼曰。大雪大雪。除道而出。最高者幾與檐齊。王戲瓊飛千里。一白。賊以大雪故。三日不出。百姓縋城墜樓乘間逃逸者甚多。

總統張公佚事

由吳淞出海過崇明。至於海門。見有白衣冠者數人。問之。則總統張公部曲。為公持服者也。其二人語及公。仰天涕泣。述公逸事甚詳。公之初薨。朝廷以尸骸未獲。數月未忍議卹。先皇帝聖諭有云。東南半壁。倚為長城。尚冀該提督不死。出為國家宣勞。又云。張國樑若在蘇常一帶。何至糜爛。若此。讀者無不感激涕零。謂朝廷知人善任。而江南士庶不克長承庇蔭。為可惜也。公年十八。作盜魁。任俠結客。跳刀拍張。能以勇略懾儕輩。其黨李某為土豪。所困。公怒。率眾往劫破其家。卒挾李某以歸。時為之語曰。拯弱鋤強。張嘉祥。嘉祥公初名也。前廣西巡撫勞公崇光聞而異之。遣將招撫。改今名。忌者恆欲假事殺之。周文忠公天爵愛其才。保護備至。及隨向大臣追賊東下。每一戰捷。輒加一官。年二十八而聲威遠著。為國虎臣矣。向大臣桂林。長沙。武昌之捷。皆與公俱。相倚如左右手。而公之立功。尤以克復太平著。賊據江

寓以精銳扼守太平為犄角計。向公欲取之。問諸將誰敢往者。衆不應。公獨慷慨請行。向公喜而撫其背曰。吾固謂非弟無能破此城者。即帥所部五百人往。賊初修堦。振重濠以備死守。聞公比至。不戰而遁。公徐入城。安市廩。察死喪。撫殘疾。歸報向公。往返僅七日。及向公薨。公已拜總統諸軍之命。北自瓜鎮至浦口。南至蕪湖至鎮江。上下數百里間。聞警必赴。一身如龍。涉長江如履平地。而大要尤以保固蘇常為首策。時為之歌曰。殺賊江上。江水紅。向公黑。虎張公龍。鍾山大戰疾風雨。張公生龍向公虎。公與向公共平。鍾山賊壘。礮傷中指。蒙恩賞給御用藥散。諭以勇猛之中。宜加慎重。中間尚方珍玩。賜予絡繹。且命圖形以進。公自念遠方武臣。受殊眷。膺重寄。日夜感泣圖報。挾齒寄歸。示無生還期。自偏裨擢至大將。所得祿俸。不以一錢自私。軍中豪傑士。或有負俗之累。需用數百金。公立予之。故人入願致死力。洎乎丹陽之變。力竭捐軀。而公年三十有八矣。喪歸。無以葬。得勞公賻。始克成禮。鉢池山農曰。粵賊自據金陵。蓋無一日忘蘇省垣。諸公得以高枕而卧。七覺不驚者。向張之力也。當夫和營瓦解。呼吸存亡。待饑孔迫。司財者從而靳之。倘所謂殺其生已者。與總統既歿。賊遂恣肆而無所忌。逾月之間。州縣十喪八九。嗚呼。不有今日。誰念前功哉。

雙燐

同治元年春。養病於秦郵之仲氏莊。仲君敬夫為說雙燐事甚奇。東台某鎮有女子依兄以居。兄常賈於外。鄰少慕之。私結盟焉。一日兄自外歸。鄰少方匿女室。倉皇乘間而逃。兄追之弗及。返而詰女。繼以捶楚。女不堪其虐。及夜自經死。鄰少聞之。涕泣不食。越日晨出。久不歸。其父訪之。死於河矣。父為請於女兄。願得女柩而合葬焉。兄不可。且曰。若不教子。污辱我門第。今掩覆之不暇。猶欲彰之。貽後人笑乎。乃俟鄰少既葬。故遠之。而葬女於河東。相距半里許。葬後數日。暮行者忽見燐火。自鄰少墓出。慘碧如將燼燈。方注視間。女墓上亦有燐火。冉冉而升。漸行漸近。已而相為追逐。上下盤旋如弄丸然。久之。同入女墓。明日又八鄰少墓。如是者三十餘年。乃滅。予為作雙燐歌云。

殺鬼

秋七月。將入都門。遇賊於邳睢而止。夜闌將卧。同寓葉于戎者。奔而歸曰。億哉。今夜殺一鬼矣。蓋厲之東有古廟。葉以赴飲遲歸。過廟前。月影朦朧。見一婦人向門而拜。又結帶為環。繫於柱上。躡足窺之。則環中樓臺粉黛。五色爛然。婦人若卻若前。忽哭忽笑。又一美少年自內招之。葉恍然悟為縊鬼。急拔刀刺入環中。環帶遽收。劃然中斷。而婦人仆矣。葉呼之不醒。恐以曖昧獲咎。遂行。俄有呼葉於後者。長身綽約。細語如鶯。葉佯為不聞。已而披髮吐舌。雙目

如鈴曰償我環來葉曰吾以汝為人耳今乃鬼耶揮刀迎鬪中其左肩嗥然一聲化為清煙而滅

合璧

日月合璧五星聯珠之瑞我朝凡三見上年八月朔珠聯璧合而言者不同壬戌初冬從軍宿州文案盧鎔齋於是日五鼓登瞭臺以遠鏡窺之先是東海霞光蔚為五色俄而一輪捧上徑可三丈許中瑩如玉四圍如琥珀又一輪相承而起則紅光竟天駕手前出者之上旁有小輪前一而後四如爆火流星逐月狀兩大輪相摩相盪金碧四射雲霞變動海水若飛移時日上月移而東而五星亦漸隱矣

劫典

淮揚典鋪十數所年來劫掠殆盡然皆關力非關智也惟興化一典被劫最奇先有營弁四人至典中告以途次遇賊竊去十數箱箱何狀何夜何物今舟泊何所倘來典幸相關白與汝無干若隱諱受贖必不汝費店主許諾越三日果有十餘健兒舁數箱至典中竊竊疑之及啟一箱衣物大半符合遂以婉言羈絆而遣人密白營弁營弁即率勇持械而至遽令閉門大呼捉賊突有人從箱中出塗面帕頭各手兵器與營勇及前舁箱者合擒典眾而縛之

席捲所有。由後門負之而去。先是市人聞典中捉賊各探消息。久而寂然。及暮而前門不啓。保正試從後門探之。則典中人羣繫於柱。辮髮纏口。瞠目相視。不能發一言。急解其縛。各吐胡桃一枚。述其所遇如此。

泛海

年來泛海數次。遇險者二。其一由通赴滬。五鼓過崇明。有黑雲自南而北。狂風繼之。舟人倉皇下錨。海中有物高起如嶺脊。黃黑相間。天濤激盪。波浪騰沸。而不見其全。已而昂頭出水。大如甕。非魚非龍。向雲而噓。口中結氣如珠。吞吐出沒。而風勢益壯。他船折桅損舵者甚多。時同治二年春也。渡海四絕之一。云黑雲殘月墮。平蕪魚目光懸。徑寸珠。莫向風波數行役。如今滄海是夷途。又通州曉發。遇風云。天亦傷時會。悲呼氣未平。怒潮衝石語。高樹逆山行。穀價豐猶貴。兵鋒憤不驚。劇憐垂白叟。苦語祝昇平。

驢案

安東丁甲。傭工於寶應僧寺中。有驢一頭。為往返代步之資。同里莊姓。忽至寶應。語丁曰。汝母病篤。望汝急歸。勿緩也。丁即策蹇與莊同返。半途莊謂曰。足力疲矣。佳騎能暫假否。丁諾之。莊乘而鞭之。頃刻馳去。及丁抵家。而母初未病。莊與驢皆未還也。候之數日。知為所誑。慮

其復至僧寺。詐取錢物。遂辭母自往跡之。遇諸途。手牽一驢而非丁畜也。詰之。莊曰。易之矣。丁大詫曰。吾驢齒壯。此已老。易何為者。莊曰。彼固貼錢數千。現在囊中。丁猶不願。又出布衫一領曰。以此補足何如。丁乃著衫。置錢於驢背而行。將及淮北之成公橋。遇地保縣役數人。拍其肩而語曰。若事犯矣。丁驚曰。我犯何事。曰。刺其人而奪之驢。猶佯為不知者耶。即逮赴縣。蓋莊賣丁驢後。僱驢成公橋。而手刺其人。攘其布衫。丁不知也。知縣王明府問殺人狀。丁茫然。王拍案曰。布衫血跡猶存。汝從何處掩飾。丁曰。是皆莊某為之。王傳驢行人。及被刺未死者相質。皆曰。莫知其姓。然貌是此人。王遂以嚴刑逼洪。至用線香熏腋下。丁不勝拷掠。遽誣服。瘦死獄中。先是丁氏閩族。具保狀。邑紳亦力言丁冤。王以為南山可移。此案不可動也。他日。莊以竊案見獲於寶應。一訊而輸前情。及移文山陽。而詳勘已定。因並收莊獄中。亦瘦死。後一月。王坐堂皇治事。家人奔告公子病。急入內室視之。子方跳叫作丁語。呼冤人曰。此官事。何以讎其子。曰。官祿未盡。使之親見其子女之亡。而後及其身。無所逃也。言已而死。未幾。女繼之。刑名幕友又繼之。後三年。王寓省垣。見丁至。大叫而卒。

兩軍門

初粵賊蔓延江浙間。中丞李公以上海一隅地遠。攻進剿。如風掃箒。破復蘇常。餘賊聚守金

陵明年曾公大兵屢掘地道於金陵城外。或半途遇水而止。或已成為賊所覺。衆力竭矣。獨提督李公臣典曰。合諸營之力。費鉅萬之財。歷數百晝夜之勞苦。所望者復城而後。仰報國恩。將士亦邀獎叙。不及今一鼓作氣。功敗垂成。後欲圖之。非可歲月計矣。乃復從賊守嚴密處。掘隧貯藥。破城垣二十餘丈。李疾率諸提鎮。冒火衝入。立奏膚功。而公亦由此受病不起矣。中丞之肅清吳中也。深得陳軍門學啓之助。偽慕王等降後。心懷反側。桀驁不馴。中丞用軍門言。乘勢駢誅。以消後患。後陳以嘉興中。破創重捐。軀奏疏中。歷叙勲勞。至今猶有生氣。兩軍門足千古矣。

孫文鳳

江浙之亂。紳士殉節者多。練勇殺賊者少。湖州趙公紹興包村。永昌徐氏之外。不多見也。嘉善孫君小雲。以令子文鳳陣亡事。屬為題詞。即書其後云。長風吹沙陣雲黑。千人合圍呼殺賊。賊羣如蠹蔽地來。飛礮當胸活不得。聞君降生誠瑰才。翩躚靈鳥翔庭階。果然文采照江浙。不與俗子同襟懷。時艱奮起脫儒幘。君時行年甫二十。丈夫事業雖未成。耿耿雄心貫天日。去年大帥收金閩。快哉擒賊先擒王。頭顱六七血猶熱。灑向平原祭英烈。

王蟾生

玉蟾生者不知何許人。生而神宇秀逸。資性超曠。自以幼年孤露。淡於名利。於人事無所嗜。一切紛華靡麗之境。衆所趨鶩者。皆以為不潔而去之。而性獨好月。居恆夜常不寐。一茗一香。一几一榻。徜徉於花陰竹石之間。濯影冰壺。遊心瓊宇。藉以蕩滌塵俗。嗑吸清華。每至斗轉星斜。玉輪西墜。則凄然欲涕者久之。陰晦之夕。忽忽若有所失。視上弦以後。月漸盈滿。則喜。既望轉虧。欸歎不遇。自髫齡至於既冠。如是者十有餘年。生嘗言五濁依月而清。八垢得月而淨。可以引精采。可以通神明。又好於月下冥想。謂人世歡娛境少。愁苦情多。甚至口不可得而言。夢不可得而訴。幽懷隱念。默寄太虛。以為世有其人。庶幾知我者乎。而生乃以其心所專注者迎之。兩心既交。互相融結。於空靈冥漠之中。故好月益甚。一夕枯坐石磴。寄想青冥。有道人黃冠羽衣。翩然而至。急起延攬。叩問姓名。道人曰。君不憶十九年前。以玉遂度瓊雲曲於清閨宮中耶。某為金粟觀主者。與君居衡宇相望。晨夕侍從甚歡。某歲中秋。素娥出遊寶霄臺。憑白玉闌干。笑指牛女。君見其侍者碧羅蘭脩。偶動塵念。素娥訴諸圓靈。玉玉謫君江淮間。並遣二女。以星紀兩周為約。君告別階墀。淒動左右。玉王念君宿業。許以少年騰達。福慧雙清。蓋二十五年復返清虛也。不謂操行不堅。心浮意蕩。削除名籍。續貶十年。若再失足愛河。精華外鑿。則將來墮落。不列真靈矣。慎之慎之。勉圖相見。言畢。振衣而起。生欲

追叩究竟轉瞬寂然自念生平誠多意惡聲華福澤約畧可知由是約意迹相之粗專精靈明之奧雖浮沈垢濁中日與形色相接而息心於冲虛淡寂之天如是者又十餘年其後科名果不振再娶不壽生亦無疾而卒卒後有見之棲霞山上者或遇幽愁哀怨不可自遣第於月夜設香花清醴默呼玉蟾而祝之其人若或忻慰云

窖金

粵寇之亂富民藏金地窖者率被掘去獨南匯某氏家鉅富贏金以萬計先事招集佃農厚予酒食使之掘地極深以八缸貯銀覆以土石完密無少罅也賊至訪得其處灌水發掘缸則猶是也而瓦鑠充滿其中白金無一銖矣賊相顧愕眙而焚其屋蓋貯金之後某率其家人婦孺窮數夜之力橫穿一穴移金而築之而佃農無一知者故免

奇報

水火兵災大劫也而積善累德之家往往有奇報江甯程翁家小康自其祖父力行善事以饋貧施藥而窮及程讀書不成去而學醫謂謀生之途惟此尚可濟人立誓不受貧戶一錢並累世持不殺戒甲子十一月舉行鄉試予與奉調闈差之沈君同行時省城設局收養難民沈為其戚訪人於局中有老媪屢目其僕淚泫泫下沈問故媪曰貌似吾兒吾夫姓程籍

江甯避兵蘇州。夫妻兒女並子婦為五口。遇賊離散。今生死不可知矣。言未已。僕躍而前曰。吾固疑為母。固吾母也。相持而哭。遂訂期同返蘇州。他日。蘇人欲僱錢娘。或以程媪薦。至則先有少婦一人。亦為主人司紡績者。相見大驚。即其子婦。媪喜梓舍之完聚。又悲其夫與女之無自訪求也。婦曰。姑勿憂。吾有從兄。前數月販茶上海。似聞小姑傭工茶棧中。媪聞即攜子婦乞假於主人。至一棧。遍詢無之。去而之他。則女而程氏者甚多。入視皆非。蓋五易其處。始知程翁自浙返滬。仍以醫行。早已挈女賃屋夷場。境况甚裕。即日訪得翁寓。翁適外出。媪一見女。即大哭。子婦涕泣勸慰。各訴艱難。並鄰里所喜歡息之聲。詳然並作。翁歸自外。蚩蚩然立。不能措一辭。忽笑忽悲。恟恟如夢寐焉。鉢池山農曰。兩間一生氣所鼓盪耳。生人者人亦生之。固宜。顧盜賊殺人如麻。而程氏一家乃全乎。其為五人焉。奇哉報也。

詩帖

金陵返擢。阻風孟河。西舫東船。同人畢集。蔣君齊九性豪邁。使從者累土如几。號為詩帖。首出近作。屬和諸君。亦各建旗鼓。摩壘致敵。挑戰不休。如是者三日。予終疊平字韻云。強鄰兩大休。鏖戰願息齊。師及楚平。於是一笑而罷。明日解纜。而雲散風馳矣。予和南梁陳聞亭下關韻云。久卧荒城畏遠行。喜聞江表息鼙鉦。雲銷戰氣依峰穩。鳥戲朝陽拂水明。近郭漸多

新屋宇。羞郵難辨舊途程。十年兵燹身猶健。贏得山靈見也驚。答袁步雲云。傳聞北地重燕
支。多買媽紅染畫思。何必才華真絕世。自然顏色易投時。焦枯默感中郎識。婉孌終傷李女詩。
誰道甘心棲枳棘。十年尋徧碧梧枝。又闌中題壁舊句云。石頭城外亂峰明。浩蕩風煙萬里
情。身世多艱惟中酒。文章無命莫求名。天空雕鶚搏雲遠。江冷芙蓉墜露清。大地烽塵需幹
濟。諸公騰達報昇平。揚州楊竹軒和云。天高霜冷月初明。惜別難忘舊雨情。感我飄蓬同宦
味。有人籠壁重才名。綺年休逐詞壇老。冰骨終宜閭苑清。出匣干將勤拂拭。近來江上怒濤
平。黃山宗感澤云。日對江山眼自明。自將流水濯塵情。閒雲出岫難為雨。野鳥窺人不識名。
地有高賢星欲聚。身無俗韻月同清。男兒各抱飛騰志。不到蓬萊氣不平。齊九和云。海天東
去大星明。水底蛟龍若有情。得意且傾三日酒。設人虛博半生名。霜高寒入關河暝。日落潮迴
天地清。獨向滄江觀象緯。當頭放見玉衡平。風程水驛間得此興會。或亦五百年香火因緣乎。

瘞文

臘八後五日。招感澤同至松江。度歲於城南費氏宅中。年皆三十九矣。文字無靈。科名有命。
愴念身世。百感橫生。因盡搜行篋詩文。掘坎庭隅焚而瘞之。而送以詩云。廿年心血聚庭隈。
拉雜摧燒散作灰。吹入九淵千丈底。結成精氣化風雷。

金壺遊墨卷五

欽旌節婦唐母安甘廬記

吳縣朱君懋之。既為其姑母請旌於朝。又求得遺骸靈諸唐氏之塋。思慕之心稍慰。一日者復手圖示余曰。記榮未嘗學問。幸不棄於大雅先姑母事寔。雖有閔君之傳。陳師之贊。以垂不朽。顧事表詞簡。體例宜然。恐後之人末由感發而興起也。撮其大要。繪為四圖。無徵者姑闕焉。庶可與傳贊並行不悖乎。余曰。諒哉。此虎頭圖列女之遺則也。朱君曰。未也。某思事以文傳地。以人重。竊嘗流覽簡編。凡賢人君子託足之所。雖窮鄉僻壤。憑弔者往往留連慨慕。如見其人。矧孤嫠泣血茹苦含辛。數十年寢饋於斯。其地其人。尤足令頑廉懦立。往者吾吳嘗有袁氏竹柏徐氏勁節二樓之建。棟宇巍然。繪圖徵詠。又得賢子孫繼述。故歷久不磨。某心竊仰之。唐氏世耕讀。姑丈時家已中落。居孫谿。與某家衡宇相望。有姑母孀居。敝廬三椽。僅蔽風雨。雖湫隘特甚。齋匾闕如。而內外峻潔。肅然也。亂後夷為瓦礫場。每過悽然淚下。徘徊不忍去。記榮竊窺我姑母家無儲石儲。賴十指以餬口。膝前無子。族屬中無可繼者。孤女至十餘齡。又殤。淒涼憔悴之况。生趣索絕。而安貧苦守。甘之如飴。某他日擬於唐氏故居。葺廬以奉烝嘗。而即以安甘名廬可乎。余不禁肅然曰。有是哉。君用心之周且摯也。夫安之為

義大矣。自來忠臣烈士赴湯蹈鋒刃。時窮勢迫。百折不回。凡以行其心之所安而已。然論者猶曰。慷慨捐軀易。從容盡節難。蓋信乎安而不遷之難也。若夫青年伉儷。慘失所天。阡無待表之兒。室乏慰情之女。饗殮莫繼。質鬻全空。極人世難堪之境。獨能隨遇而安。無絲毫怨尤。見於辭色。贅婚莫償。繼以撫姪。揆其心終不忍夫之無後。艱難委曲。以求一綫之延。甘窮餓而不悔。在易節之四爻曰。安節。九五曰。甘節。安且甘。其為亨吉孰大焉。今者旌門表墓。百世流芳。俎豆馨香。永永無極。君又仰承先志。以長子惠先後兄記梁以奉唐祀。此亦行乎心之所安。真盛德事也。異日安甘廬成。與袁徐兩樓。後先輝映。即君之風義。亦且偕孫溪楓水長流。傳言盛德必百世祀於戲澤。自此遠矣。朱君欲然曰。如子言。余何敢當。抑區區之心。不敢不勉。請識之以誌來者。爰不辭固陋。拜手而為之記。

光緒十七年歲次辛卯涂月

青浦席 威拜撰

婁縣姚肇瀛拜書

孫谿唐節婦家傳

唐節婦朱氏。蘇州吳縣人。年十七。歸同縣唐顯。唐故貧。節婦恆以女工佐之。夫死。止一女。撫

之十餘齡。女又殤。卽婦泣曰：天子不能為唐氏留一息，生復何為？其弟常浩力勸之歸。曰：骨月之親，惟姊與弟。幸毋自苦。弟婦程氏亦與卽婦素睦，因以第三子記梁畀卽婦撫之。為唐氏後。卽婦既撫記梁，念弟力之不贍也，時返孫谿故居，自食其力。記梁既長，使赴城習賈。庚申寇陷蘇州，音問隔絕。其弟遣弟婦挈幼子記榮來，依賊過其廬，欲掠記榮。卽婦厲聲叱之，賊亦駭沮，卒釋之去。而其弟陷城中，未得歸。卽婦乃語弟婦曰：弟與諸姪吉凶不可知。我與若不足計。朱氏惟此一子在，若復失散，何以對先人？相與零丁轉徙，僅免於賊，未幾其弟暨次姪記煜脫自賊中。卽婦大慰，以為可以釋肩矣。而弟及弟婦相繼病歿。又聞記梁死難之耗，諸姪惟記煜記榮存。卽婦遣亟奔上海，曰：無共斃為也。逮亂平，記煜兄弟訪其居，已夷為瓦礫。詢諸耆老，知卽婦孑身走避，亦未遇賊。依普濟堂以終。年六十。記榮念非卽婦，朱氏絕續不可知。於是命長子憲先後記梁奉唐氏祀，復求得卽婦骸骨，為瘞諸唐氏之塋。光緒庚寅，列其事於有司，以達於禮官，得旌如例。烏乎！當粵匪鴟張之日，士大夫且不免倉皇失措，況其餘乎？卽婦一婦人耳，乃能臨機制變，卒全朱氏之孤，而唐氏宗祀亦藉以不墜，可不謂賢哉！余往聞記榮言，卽婦性嚴厲，有智略，今覈諸行事，信然。然其所遇，抑可悲甚矣。

華亭閔萃祥拜撰

唐節婦贊

懿哉節婦。蚤歲歸唐。賢聲卓著。大義彰彰。夫貧能守。夫沒何望。零丁弱息。稍慰心腸。曇花復折。能弗悲愴。有姪可撫。以續烝嘗。何圖寇亂。遽致喪亡。審為姪計。海上遠颺。幸存一綫。於朱有光報以恩義。再續宗祫。請旌志行。大為表章。惟茲貞節。百世流芳。

嘉興陳其榮拜撰

歸葬遺骸記

我姑母之疾。終於山塘呂氏祠也。事在同治戊辰八月。其時寇患雖平。瘡痍未復。故廬被燬。不獲寓居。記榮年弱冠。貿易嘉禾蘇中間。欲詢確耗而未得。痛念我家。當庚申避亂。寔惟姑母是賴。昊天不弔。我父母於夏秋先後棄養。賊氛徧地。浮葬他所。先塋遠在陸墓。不能及也。先是記榮隨我父避上沙鄉。負販餬口。長兄記鍾依郭氏於齊門外。仲兄記煜先被賊擄。我母逝後。我父亦患痢下。力疾往喚。長兄歸上沙。至秋增劇。竟至不起。明年。仲兄脫自賊中。昆季均集姑母所。姑母命之曰。汝父母遭逢亂離。不幸病歿。寄厝異姓墓地。體魄不安。汝兄弟幸聚一方。當亟謀所以歸骨者。值此亂世。生死聚散不可知。毋貽他日之悔也。記榮兄弟泣受命。乃由程王兩家墓上。檢拾遺骸。合葬五泉浜祖塋。事畢返命。姑母即遣仲兄避江北。長

兄挈記榮往申習業。臨行復申戒曰：未氏存者僅汝三人。憶汝母彌留時，祇幼姪記榮在側。

遺命汝兄弟當終身友于相愛。異日幸成立，雖未能同居共炊，慎勿蹈閻廔之習。回顧汝父

謂記榮年穉，亟擇善地居之。庶父子相保也。言訖嗚咽而逝。汝父於流離顛沛中，草草殮埋。

屬記榮於范氏，而自至齊門覓記鍾。酷暑奔波，精神衰耗，病自此深矣。延至八月，亦告終。猶

諄諄惟汝兄弟為念。今汝等幸全身命，吾恐禍亂之未已也。故分遣各覓生路，苟能自立，早

謀昏娶。長子孫毋忘吾言，亦即汝父母之志也。此地雖偏僻時在申濱，乃窮鄉也，然逼近賊巢，不宜再

來。吾五十窮殘，死何足惜。異時平定，歸吾骨於唐氏之塋。雖死猶生矣。時咸豐十年辛酉歲

烏乎。詎料此別竟成永訣也哉。仲兄遂偕任竹筠渡江而北。長兄與記榮閒關至滬，雖幸有

成而作嫁，依人不克自主。往再七八年，昆季各有家室，饔飧朝夕苦乏餘貲。迴思曩日情形，

非姑母指示布置，則父母之骸骨未歸。伯仲之存亡莫卜。生成之感，何能一日忘耶。同治八

年蘇省肅清，已逾六載。播遷者漸復鄉里。記榮因事至蘇，詢姑母存否，竟無確耗。光緒紀元

復至蘇，晤長兄記鍾云：傳聞姑母在山塘普濟堂病故。年月日猶未知也。顧以他事匆促旋

申。至五年秋，長兄暴卒於蘇。記榮星夜奔赴成禮。時長嫂徐氏已前卒。祔葬五泉濱。六年春

將啟兆而合葬焉。豈知開未及尺，積水成汪。我父母兆域亦被浸潤，痛念劬勞，百身莫贖。幸

先祖陸墓山瑩尚餘隙地謹奉遺骸備櫬遷祔兄嫂則仍葬五泉浜高原從兄志也烏乎我
父母骨殖幸獲安全猶恨始事不慎水漬幽宮再遷而後已今仲兄與記榮粗堪溫飽各有
子二人以奉先祀而姑母一生苦節輾轉亂離中卒窮餓以歿歸骨唐瑩言猶在耳每一念
及跼踖難容光緒十六年余復有事在蘇詢訪既徧略得端倪兼知賊據城姑母見幾趨避
迄未遇賊賊平後走依女普濟堂以人衆與同伴諸媪別居呂家祠內寔於同治七年八月
病故記榮於是先將姑母守節事呈有司請旌於朝而歸骨則以未悉葬所尚留有待今年
夏竭誠往訪期必得先至昌善安節各局末復至盤門所謂女普濟堂者堂中人均以年遠
難稽為辭翌日再往偶向內室坐見插架有同治五年至七年冊籍悉心翻閱至一百號載
有唐朱氏於七年七月二十二日進堂八月十九痢疾病歿年六十歲字樣不禁額手謝天
者再下又載一號至十號葬於錫類義阡從十一號起別葬盤門外堂基云云而唐朱氏葬
冊在第九號每號均有磚識然則我姑母之終於普濟前既歷詢唐意卿之母及疏族唐四
官諸人衆口一詞今復冊載彰彰可攷毋庸疑矣欲設法起遷商之培德堂董周守安翁翁
謂須冬間辦理力任經營可感也爰託守翁豫備小櫬以便檢骨堅訂珍重而別仲冬上浣
復至蘇天嚴寒間以風雪承守翁放堂船雇土工等偕看阡人吳姓者初七日抵錫類阡土

地空潤約百餘畝荒冢疊疊無從識別原葬土工張長者年老矣率眾啟土厯十數處迄無一是蓋以事隔多年曠渺無垠頗難記憶亂後又為育嬰昌善各局褻葬無序暴露顛倒者甚多觸目慘然乃命依舊填築見暴露者亦加土焉反復籌思無策至望日詣普安橋

武廟誠求籤兆得十八灘頭說與君及世事盡從流水去之句先是夏間亦曾祈籤則勤耕力作莫蹉跎云云竊意神示如此終當有獲會守安翁遣陸君春生來訂明日下鄉再尋以盡人事遂於十六日如前放舟帶工抵阡開視自晨至午仍無濟乃登舟午餐枯坐蓬牖相對太息守翁謂似此曠地一望無際何異海底撈針君於此亦可謂竭盡心力矣况廿餘年來當已形銷骨化吾意招魂歸柩於理亦安余嘿無以應然終冀神言當不我欺志未決時舟尾隘工人擁擠無聊飭其荷鋤登岸姑再覓之守翁與余在船小憩一炊許忽見工人手持一磚踴躍奔至閱之正第九號女棺也兩人均色喜隨行二里餘見有一池與上次啟視所相離祇五六尺詢工人則以張長記有水池鄰近故仍於此處下鋤纔二三下即見號磚於是命逐號啟視罔不符合十號以後則平土矣乃將他號築固回城訂定諸人次日竭誠料理余不禁感極涕零默誦神恩不置十七日守翁仍挈土工等將所備應用諸物到阡午刻記榮跪地啟棺見姑母首骨未壞下頰輔頰彷彿生時惟首足胸脊諸骨則已黑如枯

柴乃積水潮蒸之故最奇者姑母晚年僅餘四齒而口中尚存其三其一旋於肩旁檢得此
記榮兄弟所記憶逼真者殆冥冥中特留首齒以示區別且與流水相鄰乃益歎神言之巧
合也於是自足至首次第檢理入所備櫬中用灰包棉花絲繻謹慎將事擇吉二十四日遷
柩吳縣十一都十四圖戴字圩孫家橋唐氏塋乾山巽向立碑隧道以記榮長子惠先後叔
兄記梁以奉唐祀即仰體先考妣之遺意其詳具閱君頤生唐母朱節婦傳中烏乎記榮蓋
是志願已及廿載僅克有成此蓋蒼蒼者不忍我姑母苦節湮沒不彰俾記榮得藉手以稍
酬生成之德於萬一烏乎豈偶然哉余既求閱君為姑母立傳將恩準建坊之資移脩孫谿
東暉橋冀垂不朽復擬於唐氏故居葺安甘廬奉祀粟玉繪圖撰記以徵題詠而於歸葬遣
骸之事艱難獲濟寔荷 神庥至我父母繼絕之盛意與亂離中困苦顛連之况尤不敢忘
也用詳頤末以告後嗣子孫我子孫其敬念之哉其敬體之哉

光緒十七年辛卯冬月胞姪朱記榮拜述

祭唐節母文

維光緒十有九年二月吉日恭送 表太姑母唐節母從祀節婦祠謹以楓江之水孫谿之
瘴致薦於 神前曰烏虜節母早失所天無子僅一女女殤嗣子又早天族無可繼者徒安

貧食苦唐字已不祀傷哉未幾粵寇陷蘇倉皇避難繫從出朱氏二猶子次即懋之表丈也
堯獨幼弱轉徙流離措其計慮幸獲保全終藉表丈所生以奉唐祀且卽母之歿大亂未平
時已無家親戚相隔鄉里善人瘞於叢冢桐棺纍纍玉骸何處幽靈重泉之下怨恫百歲之
餘而表丈乃矢志以求至誠斯格竟蒙 神示得以歸骨首邱唐堯豈非天之卮卽母者深
而章卽母者尤顯乎事既詳諸君子傳贊題咏中 曠忝附戚屬後輩聞之真切信無溢詞足
貽不朽獨思古來卽婦與忠臣義士略同當其遇家國垂盡之秋持其百折不回之心冀有
一綫能延之脰竭忠盡智或成或竟不成卒之後代俎豆馨香廟食千載固其宜也豈非天
理之變不失常乎抑人力有以勝之乎別卽母不特有光於唐氏而亦有功於朱氏其於表
丈生之猶母也則表丈宜事之猶子也間嘗觀古孝子遭遇亂離尋親骸骨萬里荆棘十年
寒暑往往有志竟成所謂欲報之德昊天罔極者固應如是而亦其親殉難之精魄多不容
埋沒於山陬海澨間茲庶得其彷彿乎然則卽母不啻有後矣體既安土繪圖表門故典畢
舉今又與諸烈魄左右輝映尸祝千禩永永無涯將以揚厲名教敦篤風俗使四方之丈夫
女子聞而感泣興起也神其妥侑伏惟敬享系以謠辭兼用頌義乃祝曰
神之來兮集女貞木聲之哀兮裂湘靈竹念昔生時言之肅穆淑人不辰夫君無祿宛宛推

如曷以似續螟蛉在室篝燈課讀鵲鳴夜鳴華寔並落區區不界且乏薄族瞻望母家亂離可傷提攜小阮不負平章克家報德再傳丞嘗圖容烈女宗表揚在天之下在地之上徐袁三節奔逸相望

表再姪長洲陳開驥拜撰

重建東暉橋記

孫谿相傳以孫武名一水縈帶西達於支硎即俗稱觀音山者故亦名觀音河跨河為橋凡十有曰東暉橋者則里人朱記榮姑母唐節婦故居之所在也記榮幼最得節婦歡嘗與寇時提攜奔走脫記榮昆季於難事平後音耗隔絕建記榮趨訪而節婦已歿并不知其匿厝所乃矢志以求卒於去年冬歸骨唐氏之塋然追慕無已既為請旌於朝例得建坊將擇地於東暉橋之址而橋已圯壞因念節婦夙以利濟為懷使節婦而在必不使頽廢遂移建坊之資以建橋成節婦志也經始於光緒壬辰五月訖閏六月落成屬其友華亭閔萃祥書其概將示後之人爰系以銘曰

節婦之行禮宜坊闡厥素志濟此梁瞰谿水之湯湯其流也芳

重建東暉橋聯

綽楔承恩移作中流砥柱

松楸在望永循百世蒸嘗

遙瞻范嶺朝天笏

靜接寒山警夜鐘

青浦席咸譔

重建東暉橋記

跨支硯塘有東暉橋焉近鄰孫祠遙揖范嶺毓秀吉履是母脈絡通濟繁興并聯臂指凡夫
村叱牧豎販夫傭趁趁趨墮隳日蓋千數歷禩渺緜月缺虹斷縛匏假葦行者唏焉歲在壬
辰朱君記榮因其姑母唐節婦之行得旌於朝將仿桓稔義閭之開仍傍孟母擇鄰之舊頗
悼越姥賣扇之阻爰法巴婦築臺之遺經始夏蒸落成秋爽鞏固開敞往來大和昔之壘廬
齧苦漆室茹辛月黯夜縫風淒晝哭橋之石兀兀是節婦之志決橋之水盈盈是節婦之心
清洎夫存歷大劫幸脫老寡白粥咽久腸枯如灰青裙立風淚盡得血卒令鑠金溘盡抱璞
告完萬媵煙莽骨惟封蟻見憐一樹雪梨魂以杜鵑代哭而斯橋也亦復廢礎孤擎洪濤大
噬青山綠水過者遷延明月清風靈兮聊浪今則朝問嘉歎鄉評引延典在豆邊樹宜楔綽

斯橋厚幸遂解墜履之警忘乘船之危焉聞之潯陽之瀨偉投金而改楫上虞之江式隨爪而殊號竊意斯舉當易嘉名持評士夫倘協於義尤欽朱君懷翼卯之慈矢肝胆之報日月雖逝金石不渝曩之歸骨於唐氏塋也亦既血誠默聯精志冥會得憑犀齒俾正狐首今之舉也蓋曰表微非惟修廢坐拯厲揭之累詎務刻雕之華視夫寶帶既捐數五十三洞渡舟可滅糜萬六千工為功則同取義尤大濤澆激薄將在於斯洞庭不圯太湖不涸長留天地有橋則三已

光緒癸巳二月長洲章鈺

唐母橋銘

粵歲辛卯記榮既尋獲姑母唐節婦遺骸為歸葬唐氏之塋塋後有小石橋在其族唐懷德所居之右往來徑道也故未有名且將圯爰葺而新之里之人請顏曰唐母欽母節也乃系以銘曰水齟齬石齒齒惟母之節既堅且泚
光緒十九年癸巳春二月胞姪朱記榮拜撰

唐母橋聯

冰雪一心淨

松楸萬古寒

題唐節母安甘廬圖

漫天雪婦之節。匝地霜方其潔。有客為我道其詳。點點都是節婦眼中血。
淚涓涓。望眼穿。樂昌破鏡不可圓。阿阮為我作螟蛉。唐宗一脈賴汝傳。

家鷄猶未已。無奈烽火干戈起。十指不療飢。紡織供刀匕。有兒死賊中。有姪陷賊裡。覺覺弱息不能支。幾度流離更轉徙。

一星曙透孤聊亦慰慈烏相隨形與影。中道復棄吾。何況棟蓐生死分。節婦之節苦如荼。

餘生脫虎口。身外靡所有。傷哉節婦病不瘳。何君使之正邱首。母族存亡不可必。大阮小阮爾知否。

風吹霧不見。雲過月當空。惟此節婦節。眾口僉雷同。大史據情入以告。惻然天子為動容。荒荒一坏土。詔書賁爾崇。紫陽有兒翹然秀。荷鋤到處訪墓封。為問當年經事人。模糊不能辨。西東。吁嗟此衷天所痛。佳城鬱鬱得之偶。合祔之禮昉周公。奠以牲牢酌斗酒。苦節畢竟天不負。龍阡會看昌厥後。

吳縣張茂鏞謹題

唐節母安甘廬圖記書後

昔吾吳節母中之有圖記者二。一為哀節母竹柏樓。一為徐節母勁節樓。今唐節母安甘廬。又有圖記。則是鼎峙為三也。按唐節母。歷歷苦節。大率與哀徐相埒。而其慨唐宗不祀。謀續於從出之朱氏。朱氏當唐申寇亂。全家幾陷賊中。特為發踪指示。俾脫生得過其半。自此朱祀延。唐祀亦因之延。凡權變而濟險也。抑有卓越乎哀徐者矣。惟是哀徐兩節母圖記。皆出自其子。而唐節母圖記。乃出自其姪子。不忍沒母之節。而圖記之於誼為孝。姪不忍沒姑母之節。而圖記之於誼為仁。孝可嘉。仁更可嘉云。

吳縣潘志奮拜崇

賦唐節婦事

自譜離鸞曲。傷哉夫所天。伶仃遺弱息。辛苦伴窮年。荼藥偕評味。蘭芽遽墮妍。弄珠虛照月。靈玉脫霏煙。朱襪方興矣。唐宗何忍焉。螟蛉差可負。蠶蟹兩能全。卍角隨羣幼。犛牙付一編。荻丸晨課下。鍼黹夜燈前。烏鳥慈懷摯。紅羊浩劫連。身家休顧問。骨肉各分遷。捷旆俄林立。妖氛敢蔓延。蜘蛛空待補。窟兔得言旋。哀祚謀重繼。沈疴療不痊。掩骸勤訪墓。候氣未支綿。褒獎行宣詔。哀榮且及泉。吁嗟節婦節。大義豈箋箋。

吳縣潘志詢拜書

題唐節母安甘廬圖

備極天民苦。新婚便死離。左家惟有女。鄧氏竟無兒。松柏相承悅。冰霜不改移。敵廬仍世業。漆室感時辭。莽莽重泉路。兢兢恤緯思。縱傷屢金綬。尚望振門楣。銀鹿將河弄。金鑿又遽推。桃承猶子續。訓仰大家施。鼙鼓喧闐起。舟車轉徙危。勇能排賊刃。智克免宗支。軍事方紛若。先靈更餒而。嗚鴉嗟毀室。螺贏復含飴。節與共姜埒。功同杵臼奇。休拘人後說。明史傳張詩。

壬辰小除夕元和張一磨未定稿

題唐節母安甘廬圖集陶靖節句

幽蘭生前庭。天高風景澈。青松在東園。卓為霜下傑。感彼柏下人。深得固窮節。貞剛自有質。時時見遺烈。天道幽且遠。孤雲獨無依。良人不可贖。願言同此歸。弱女雖非男。慰情良勝無。一朝長逝後。值歡無復娛。竟抱窮苦節。門庭日荒蕪。再喜見友于。親戚共一處。試攜子姪輩。無樂日欣豫。刑天舞干戚。賢者避其世。分散逐風轉。冬日淒且厲。栖栖失羣鳥。舉目情淒沍。日暮猶獨飛。不知竟何之。東方有一士。委懷在琴書。弱冠逢世阻。暫與園田疎。一去三十年。登涉千里餘。投策命晨裝。行行循歸路。每每多憂慮。直為親舊故。銜哀過舊宅。惻愴多所悲。

自從分別來。奄去靡歸期。崎嶇歷榛曲。高墳正焦堯。四面無人居。白楊亦蕭蕭。諒哉宜霜柏。見別蕭艾中心在。復何言。寔由罕所同。魂氣散何之。枯形寄空木。相將還舊居。鼓棹路崎曲。山澤久見招。非為卜其宅。懷此頗有年。今日從茲役。回顧慘風涼。寒餒常糟糠。清卽映西關。憶此斷人腸。早終非命促。有生必有死。既沒傳無窮。奚止千萬祀。

吳縣謝酸

安甘廬記

安甘廬者。欽旌卽婦吳縣唐母之故宅。其猶子朱君懋之。重葺之以奉歲祀者也。架屋一椽。足蔽震凌。量地十坊。匪曰湫隘。卽婦以長干之共處。相夫子而有家。作羹入厨。擔盂行野。牛衣卧貧。鴻紫齊舉。怡怡如也。洎乎歌作陶鑿。謚議黔壘。寂寂獸旦。寥寥誰語。豈況微蘭未兆。曇華俄空。卽婦廼守一醮。從終之義。援三思為後之條。人情曲合。奉曹充以外孫。骨肉至近。嗣正倫者。兄子。如苦訓心。折憂勵志。固已開行義之閭。倘孝德之里矣。無何洪飈慘扇。妖火構興。拔宅無術。楚炬堪憐。卽婦則有墜魯姑。竄蹟下廡。不同梁女。卒得已兒。遂存范鐵之孤。仍絕庾信之系。懋之於是。感卵翼恩。表貞苦節。前廉范之足。執駭而歸。傳烈女之圖。楮毫斯託。題橋柱而懷清。封墓穴而展禮。就倚獻之奉室。起偏棲之門樓。九京有知。三徑無恙。每當夜雨。淒其神颺。瑟瑟若吾。意壞壁懸。籬破窗裂。紙吟唔。課讀宛轉。鳴機此情。此景。猶將彷彿乎。

遇之

同邑董瑞春撰時乙未孟夏

題唐卽母安甘廬圖

黃鵠哀吟失所天。撫懷弱女一悽然。曇花彈指成虛幻。影隻形單倍可憐。茹苦含辛慣食
貧。毀容甘作未亡人。敬廬幸在猶堪守。非忘同胞骨肉親。家計蕭條賴女工。寒宵燈火兩
人同。弟能愛我時相顧。儂自清貧守素風。撫姪承桃慰母心。朱唐婚媾誼尤深。篝燈課讀
寬嚴濟。寒夜更長自理針。百萬紅巾卷地來。流離分散寔堪哀。從今兩地相思苦。生死存
亡永自猜。旌門典重感恩榮。聊慰當年保護情。從此東暉橋畔水流芳。百世有餘清。

元和王同德拜題

奉題唐卽母安甘廬圖

觸目淒涼號鬼賊。風雲黯黯日無色。天傾地陷一廬存。中有奇光難掩抑。借問續成此幅胡
為乎。云是唐母食貧守志圖。茹苦含辛婦道那堪無。子更無夫。瑟瑟琴敦同鼓。襁褓無可撫
欲死不死。非惜死。故將奇節傲終古。精寇起。萬事已。男號女啼。爭思避。母獨從容。保猶子。猶
子依母獲安全。朱氏宗祧賴以綿。歸已無家歸不得。善堂甘入盡餘年。吾思守而不貧兮。道

產猶存原可託。貧而有子兮。菽水承歡亦能樂。古來不少稱貞節。境遇問誰唐母若。卓哉猶子亦奇人。兒長不忘姑母恩。號哭荒郊求骸骨。載歸為葬為招魂。一朝丹詔日邊來。天上施恩到夜臺。從祀建坊表其節。不教酒設在高萊。死若有知應不恨。蓋棺方見有定論。不信試看冢壘纍。大半無人供麥飯。母有猶子母不死。勝人撫孤已萬萬。况復繪圖徵詞章。琳瑯滿目足表揚。笑吾未夢佐公筆。那有江郎福錦長。效顰握管試吟哦。吟不盡意欲奈何。更倚楚些成一闋。春秋若作降神謠。謠曰。嗚呼母兮。生兒無依。死可無據些。生兒無名。死可無譽些。魂兮歸來。叢冢不可以處些。嗚呼母兮。生兒無嗣。死可無子些。生兒無養。死可無祀些。魂兮歸來。故家不可以止些。茹荼懷藥。母志已伸些。旌門表墓。母節常新些。為母奉祀。已全母倫些。春秋有享。鉅典可遵些。魂兮歸來。來格來歆些。亂曰。生多憂危。死宜安些。生多辛苦。死宜甘些。敝廬猶在。將若峙於江南些。彼有三從。亦有死安得如母之不刊些。錄塵

諸詞壇大足郢政

香涇郭紹裘求是草

題唐節母安甘廬圖

青青巖上柏。鬱鬱嶺頭松。歲寒節乃見。歷此冰雪容。節婦失所天。難難無一錢。轉轉歷所變。棄卻釵與鈿。喜有女如玉。聊以伴空谷。少慰未亡人。焉知年壽促。大者婆有女。違計鄧無男。

一病呼不起。天花幻優曇。弟憂姊所苦。何以慰遲暮。蟬蛉蜉蝣子。兔絲女蘿附。朱家一塊肉。唐家一脈續。吁嗟長卿妻。慷慨歸辭屋。歸來撫孤兒。仰屋兒啼飢。女紅手自給。不使旁人知。天狗夜墜地。紅寇忽西起。弟婦攜幼子。避來烽火裡。賊來奪其姪。節婦走進叱。侃侃陳大義。賊沮而駭。出城閉亂蒿萊。翦飛眼難開。可憐弟與姪。望斷不能來。旌旗滿南國。忽見弟與姪。咄嗟運智囊。周旋圖良策。不知分道行。他日共太平。豈知弟與婦。俎謝留弱丁。節婦失聲哭。有子亦遭戮。壯哉一義民。喜光節婦族。中原速賊清。有姪名記榮。閒關覓節婦。足跡逢上成。傳聞寄普濟。至已幽宮閉。檢骨鄰清泉。思通神示偈。奉歸葬孫溪。請旌節表題。祀子以承孫。可慰節婦兮。輯廬曰安甘。徵題各幽探。中有大手筆。我詞苦自愁。不見繫組綬。不及一婦節。節婦秉大義。列變而能守。智設朱氏安。烈叱賊胆寒。慷慨捐軀易。從容盡節難。乃知大丈夫。慚愧弁而冠。

時在光緒二十一年三月二十六日夜於古吳古五畷園對山閣下題 長洲張恭釗

題唐節母安甘廬

烏虜節母早失所。天左家有女一綫。冀傳曇花復隱。天道惘然。弟有赤子。昇母承先。何圖厖劫。又靈烽煙烽煙乍起。弟往依焉。弟幼姪孤為謀生全。促避海上。弟祀以延。賊氛俄掃。孤姪

言旒母廬十笏。都變桑田。詢母起居。歿已六年。招魂何處。劍池之邊。為覓遺骸。為發荒阡。首邱唐氏。長夜綿綿。事聞於朝。楔綽榮宣。姪心惻惻。恩義猶慙。爰新故址。結廬三椽。顏曰安甘。祀事孔虔。嗚呼節母。松柏方堅。松相比堅。惟母之賢。

乙未余月 吳縣錢人龍并書